

新元史

第四册

本紀第十四

新元史卷之十四

賜進士出身日講起居注官翰林院侍讀國史館纂修膠州柯劭忞撰

成宗下

三年春正月癸未朔暹國羅斛國及沒刺由諸番來貢
方物賜暹世子虎符庚寅遣使問民疾苦除本年內郡
包銀俸鈔免江南夏稅十之三增小吏俸置各路惠民
局封藥木忽兒爲定遠王辛卯命御史臺鞠浙西廉訪
使王遇賊罪壬辰杖流高麗藩臣趙仁規於安西崔沖
紹於鞏昌工部尙書也先帖木兒翰林待制賈汝舟齎
詔諭高麗王王暉自今命官有罪毋輒行殺戮癸巳哈

刺哈孫爲中書左丞相是月詔中外軍官奧魯官撫養
軍人不得妄有科配置各路管民官招誘新附軍人逃
竄者限百日內出首免罪二月癸丑朔車駕幸柳林丁
巳罷四川福建等處行中書省陝西行御史臺江東荆
南淮西三道宣慰司立四川福建宣慰司都元帥府陝
西漢中道肅政廉訪司壬申加號解州鹽池神惠康王
曰廣濟資寶王曰永澤泉州海神曰護國庇民明著天
妃鹽官州海神曰靈感宏祐公吳大夫伍員曰忠孝威
惠顯聖王金齒蠻來貢方物庚辰車駕幸上都三月癸
巳緬國世子信合八的奉表來謝賜衣遣之補陀僧一

山齋詔使日本諭以通好息民之意日本人不報甲午
命何榮祖等更定律令夏四月庚午申嚴江浙兩淮私
鹽之禁己卯禮部尙書月古不花爲中書左丞五月丙
申海南速古臺諸番來貢方物庚子復立征東行中書
省闊里吉思爲平章政事耶律希逸爲左丞六月癸丑
罷大名路黃河故道田租秋七月丙申淮安等縣蝗在
地者爲鶩啄食飛者鶩擊殺之詔禁捕鶩著爲令八月
己酉朔日應食不食九月癸未車駕幸古柵受諸王百
官賀聖誕癸巳罷括江南手號軍己亥車駕至自上都
冬十月戊申朔有事於太廟壬子冊立伯牙吾氏爲皇

后甲寅復立海北海南道肅政廉訪司十一月戊子釋
罪囚二十人十二月癸酉禁捕天鵝鷓鴣

四年春正月辛丑詔蒙古都元帥也速帶兒勿擅決重
刑癸卯復淮東漕渠二月丁未朔日有食之丙辰皇太
后崩甲戌罷稱海屯田改置於阿札之地乙亥車駕幸
上都置西京太和嶺屯田丙子命李庭提調諸衛屯田
夏四月丙辰置五條河屯田丁巳緬國遣使進白象戊
午中書省斷事官不蘭奚爲中書平章政事五月癸未
諭集賢大學士阿魯渾撒里等曰集賢翰林乃養老之
地自今滿秩者遷官勿令輒去六月己酉立緬國王子

窟麻刺哥撒八爲緬國王王子高麗國王王王眎來朝丙
辰太傅月赤察兒爲太師中書右丞相完澤爲太傅丁
巳御史中丞不忽木卒貧無以葬賜錠五百錠甲子立
耽羅總管府暹爪哇弔吉而蘸八等國遣使來朝秋七
月甲戌朔上皇太后尊諡曰徽仁裕聖皇后乙酉緬國
阿散哥也遣其弟者蘇等九十一人來貢方物詔者蘇
赴上都餘留安慶八月癸卯朔阿魯渾薩里爲中書平
章政事閏月庚子車駕至自上都中書右丞賀仁傑爲
平章政事九月甲子改中御府爲中政院冬十月癸酉
朔有事於太廟十一月壬寅朔詔免兩都隆興路大德

五年絲銀稅糧附近養駝馬諸郡免稅糧十之二其餘免十之二徒罪減半杖以下釋之江北荒田耕種者收稅展限一年著爲令勅中書省定鹽法條畫十二月癸巳劉深合刺帶等將兵三萬討八百媳婦蠻

五年春正月壬子罷檀景兩州探金鍊冶提舉司二月巳卯劉深合刺帶並爲湖廣行省中書右丞鄭祐爲參知政事皆佩虎符丁亥立征八百媳婦二萬戶府丁酉車駕幸上都敕雲南行省汰冗官千五百一十四員巳亥永甯路阿永蠻酋雄挫來朝賜幣帛有差三月戊午馬來忽等國遣使來朝巳巳戒飭中外官吏巳未也速

忽都爲湖廣行省參知政事與劉國傑等討四川叛蠻
是月征東行省平章政事闊里吉思以不能和輯高麗
召還薛超兀兒忙兀都魯迷失等自緬國阿占城班師
夏四月壬午調雲南軍討八百媳婦癸巳宣慰使塔察
兒刑部尙書王爲亨使高麗詔諭高麗王曰向以爾國
自作不靖遣平章政事闊里吉思等與王鎮撫之非欲
久任於彼今已召還然聞爾國越禮濫罰官兀民弊王
其勉思累朝覆育之恩以本國生靈爲念威福予奪當
自己出事體有未便民情有未安者其審圖之五月辛
亥怯烈亦帶脫脫以兵討土番丙辰曲靖等路宣慰使

忽林失入覲壬戌雍眞葛蠻宋隆濟叛六月丙戌宋隆
濟陷楊黃寨雍眞總管府達魯花赤也里干遁己丑緬
國遣使貢馴象九壬辰宋隆濟寇貴州知州張懷德戰
敗死之秋七月丁未命御史大夫禿忽赤整飭臺綱軍
官受贓者與民官同例量罪殿黜戊申立耽羅軍民萬
戶府癸亥叛王哈丹孫脫歡來降暗伯阿忽台並知樞
密院事河南妖人段丑厮等詐稱神異誑衆伏誅八月
甲戌雲南行省平章政事薛超兀兒等以兵討金齒蠻
水西土官妻蛇節叛應宋隆濟九月庚辰彗星出東井
征緬萬口曳刺福山等進馴象六河南行省平章政事

二哥等赴雲南訊諸王闊闊平章政事薛超兀兒忙兀
都魯迷失左丞劉得祿參知政事高阿康受賂旋師之
罪冬十月丙寅朔以畿內饑增明年海運糧爲百二十
萬石己巳緬國遣使來貢方物戊寅雲南武定路蠻酋
羣則來貢方物壬午車駕至自上都丙戌以歲饑禁釀
酒弛山澤之禁十一月丁未劉國傑也先忽都將萬人
入刺阿塔赤將五千人討宋國濟蛇節羅兒酋阿女等
戊申猺人藍賴率丹陽三十六洞來降十二月甲戌定
強竊盜條格

六年春正月乙巳晉王甘刺麻卒丁未命江浙行省平

章政事阿里專領江浙財賦庚戌江南僧石祖進告朱清張瑄不法十事命御史台鞠之帝問台臣曰朕聞江南富民侵占民田致貧者流離轉徙卿等聞之否對曰富民乞護持璽書倚以欺貧民官府不能詰治宜悉追之帝卽命行之毋越三日己未諸王眞童坐誣告濟南王也里只謫劉國傑軍中自效二月庚午謫諸王孛羅於四川從軍自効丙戌陝西行省平章政事也速帶而參知政事汪維勤湖廣行省平章政事劉國傑同討亦奚不薛一切聽也速帶而劉國傑節制罷討八百媳婦免右丞劉深等官癸巳帝不豫釋京師重囚三十八

人是月遣乾討虜軍征亦奚不薛依例給軍械糧餉三月丁酉以水旱災大赦天下甲寅合祭昊天上帝皇地祇於南郊中書左丞相哈刺哈孫攝祭事夏四月丁卯曲赦雲南諸部蠻夷釋大都輕重囚三十八人庚辰上都大水戊子車駕幸上都五月戊申太廟寢殿災六月癸亥朔日有食之太史院失於推驗詔中書省議罪以聞甲子建孔子廟於京師辛未有事於太廟乙亥安南國遣使貢方物及馴象二秋七月辛酉江浙行省參知政事忽都不丁爲中書右丞九月己酉龍興路譌言括民間童男女至有殺其子者命誅爲首者二人冬十月

甲子改浙東宣慰司爲宣慰司都元帥府徙治慶元罷
軍儲所立屯儲軍民總管萬戶府浙西人林都鄰告廉
訪使張珪藏禁書及推算帝五行運使合只亦劾珪沮
撓鹽法勅臺省官同鞠之丙子車駕至自上都十一月
甲午劉國傑裨將宋光與蛇節等戰大敗之辛亥同知
樞密院事合答知樞密院事十二月庚申朔雲南地震
戊辰又震甲子衡州賊袁舜一等伏誅高麗國王王哂
來朝

七年春正月乙卯籍朱清張瑄家資戊午定民官陣亡
子孫降祖父秩二等蔭叙格二月壬戌詔中書省汰諸

司冗員辛未平章政事行上都留守木八刺沙陝西行
省平章政事阿老瓦丁並爲中書平章政事江南行臺
御史中丞尙文爲中書左丞江浙行省參知政事董士
珍爲中書參知政事丁丑定中書省自左右丞相以下
平章政事二員左右丞各一員參知政事二員爲八府
已卯侍御史朶台爲中書參知政事庚辰監察御史杜
肯構等劾太傅完澤受朱清張瑄賄不報壬午諭中書
省曰比有以歲課增羨希求爵賞者此非培克於民何
從而出自今除元額外勿以增羨爲正數罷江南財賦
總管府及都水庸田司行通政院三月庚寅遣郝天挺

塔出等十四人宣撫循行諸道仍下詔戒飭之都城火
徙甘肅肅政廉訪司治甘州乙未中書平章政事伯顏
梁德珪段貞阿里渾薩里右丞八都馬辛左丞月古不
花參知政事迷而火者張斯立並坐受朱清張瑄賄免
官洪君祥爲中書右丞甲辰詔曰慶賞刑罰國之大柄
二者不可偏廢朕自卽位以來恪遵聖祖成憲優遇臣
下品爵以榮其身祿賜以厚其家期於履正奉公有裨
國政百姓又安以稱朕懷不務出此若平章伯顏暗都
刺右丞八都馬辛等營私網賄蒙蔽上下以致政失其
平民受其弊今已籍沒家資投戍邊遠明正其罪用是

更張以清庶務遣使巡行郡邑問民疾苦分別淑慝以
近年所定贓罪條例互有輕重特勅中書集議酌古準
今爲十二章又以官吏俸薄不能養廉京朝百司月俸
之外增給祿米外任官無公田官標撥公田無田則量
支祿米自今已始凡在內外有官守者洗心滌慮公勤
奉職治民均平無俾吾民重困式符委任責成之意乙
巳殺前雲南行省右丞劉深罷雲南征緬分省戊申卜
蘭奚岳鉉等進大一統志賜賚有差己酉諸王脫歡坐
誣告諸王脫脫謫湖廣軍前自効甲寅車駕幸上都夏
四月癸亥徵陳天祥張孔孫郭筠至京師天祥孔孫爲

集賢大學士筠爲昭文館大學士皆商議中書省事庚辰蛇節降丁亥蛇節伏誅禁管民官打量軍人地畝五月丁未諸王牀兀兒入覲乙卯立和林宣慰司都元帥府忽刺出遙授中書左丞爲宣慰使都元帥閏月戊午朔日有食之壬戌禁軍民犯曲阜林廟已巳徵諸王孛羅眞童入覲右丞相完澤卒庚辰雲南行省平章也速帶而入覲獻金五百兩帝曰此卿等効死所獲者賜鈔償之六月癸巳叛蠻雄挫降乙未命阿伯阿忽台等整飭河西軍事秋七月丙寅哈刺哈孫爲中書右丞相知樞密院事丙子敕集賢翰林院老臣預議朝政其餘三

品以下年七十者皆升散官一等致仕罷遼東宣慰司
丁丑叛王篤哇察八而滅里帖木兒等皆請降詔安西
王置駙傳以俟其來戊寅叛蠻麻刺降獻童男女二百
人金五百兩及馬牛羊却之是月斷事官帖木兒不花
等使高麗執其藩臣石胄及胄子天補赴京師八月辛
卯地震平陽太原尤甚庚戌緬國獻馴象四九月戊午
車駕至自上都兵部尙書脫脫帖木兒使高麗執其國
相吳祈赴京師是月高麗國王王暉入朝詔止之冬十
月辛卯復立陝西行御史台刑部尙書塔察兒翰林直
學士王約使高麗癸巳只而合忽知樞密院事庚子改

普定府爲普定路以蠻酋容苴妻適姑爲總管佩虎符
改敘州路爲敘南等處諸部蠻夷宣撫司庚戌翰林國
史院進太祖太宗定宗睿宗憲宗五朝實錄十一月甲
寅併海道運糧萬戶府爲海道都漕運萬戶府亦乞不
薛賊黨魏傑等降己卯諸王滅怯禿玉龍帖木而使察
八而十二月甲申朔詔內郡歲比不登其民已免差徭
者并免其田租乙酉弛京師酒課辛丑免順元等路本
年逋稅丁未以轉運勞免思播二州辰沅等路稅糧一
年常漕三分之一淘金站戶無種佃者免其雜役是年
諸道奉使宣撫罷賊吏一萬八千四百七十三人徵賊

四萬五千八百六十五錠審冤獄五千一百七十六事
八年春正月甲寅彗星出於奎己未以災異迭見詔恤
民隱省刑罰除色目人外願爲僧道者若平戶丁多差
役不缺及有昆仲侍養父母者方許簪剃凡妄獻田土
山場窰冶希圖徼名貪利者悉禁之平陽太原兩路免
差稅三年上都隆興延安大同懷孟衛輝彰德真定河
南安西等路免二年保定河間兩路免一年江南佃戶
私租太重以十分爲率減二分著爲令仍弛山場河泊
之禁其田宅之訟除契約分明依例賜給外其餘盡行
革撥諸路罪囚廉訪司分別審錄輕者決之有疑者分

具始事申臺詳讞庚申雲南順元同知宣撫事宋阿重
執其叔父隆濟來獻癸亥禁錮朱清張瑄族屬丙寅御
史中丞太僕卿塔思不花爲中書右丞江南行臺御史
中丞趙仁榮爲中書參知政事是月平陽地震二月甲
午徙建康道廉訪司治甯國甲辰翰林學士承旨撒里
蠻進金書世祖實錄節文一冊漢文實錄八十冊丙午
車駕幸上都三月戊辰中書左丞尙文乞致仕不允詔
受宣勅不赴任者永不敘用夏四月丁未分教國子生
於上都丙寅禁納鷹鷂人濫給鋪馬五月癸未朔日有
食之壬申罷福建都轉運鹽使司是月霖雨河決祥符

太康獲嘉陽武等縣六月丁酉汝甯縣妖人李曹驢等
妄言得天書惑衆伏誅秋七月辛酉罷江淮等處財賦
總管府癸亥諸王合贊遣使入貢八月杭州火九月癸
丑車駕至自上都庚申伯顏梁德珪復爲中書平章政
事八都馬辛爲中書右丞迷而火者爲中書參知政事
江浙行省平章阿里爲中書平章政事庚午戶部尙書
張祐爲中書參知政事癸酉叛王察八而朶瓦等來降
冬十月辛卯有事於太廟辛巳宣徽使大都護長壽爲
中書右丞陝西行省右丞脫歡爲中書參知政事丁亥
安南國遣使入貢庚寅封皇姪海山爲懷甯王戊戌杖

流吳祈石天補等於安西十一月壬子制用院使忽鄰翰林直學士林元撫慰高麗戊辰武備卿鐵古迭而爲御史大夫十二月辛丑封諸王出伯爲威武西甯王

九年春正月壬申弛京師酒禁二月丁酉封諸王完澤爲衛安王定遠王岳木忽而爲威定王辛丑大赦天下詔御史台翰林院國史院集賢院六部舉五品以上廉能識治體者三人行省行台各路宣慰司舉五人大都上都隆興三路免本年差發稅糧腹裏各路免包銀俸鈔江南佃種官田免租稅三分前年拖欠差稅課程並行蠲免敕有司非急之務毋生事煩擾小罪卽與疏決

勿禁係鰥寡孤獨常年養濟外每人賜中統鈔十兩官
司常加存問年八十以上存侍丁一名九十以上存二
名免其差役流民不能復業者官司常加優恤願種官
田者免差稅五年是月忽鄰卒於高麗三月丁未朔車
駕辛上都戊午樞密副使高興爲中書平章政事仍樞
密院副使夏四月乙酉大同路地震壞廬舍無算壓死
二千餘人懷仁縣地裂湧黑水己丑東川路蠻酋阿葵
來獻方物五月戊申徵陝西儒學提舉蕭剌赴闕命有
司給以安車戊午改各道肅政廉訪司爲詳刑觀察司
以地震改平陽爲晉甯路太原爲冀甯路六月丙子朔

以立皇太子遣中書右丞相哈刺哈孫告昊天上帝御
史鐵古迭而告太廟庚辰立皇子德壽爲皇太子賜高
年帛有差孝子順孫量材任用親年七十別無侍丁者
從近遷除外任五品官以下並減一資致仕官止一子
承廕者免爆使家貧給終身半俸其精力未衰者錄用
之罪囚五年以上除惡逆外疑不能決者釋之流人量
移內地秋七月辛亥始立郊壇丁卯大司徒段貞中書
右丞八都馬辛並爲中書平章政事參知政事合刺蠻
子爲右丞參知政事迷而火者爲中書左丞參議中書
省事也先伯忽爲參知政事八月丁丑給曲阜林廟洒

掃戶以尙珍署田五千頃供祭祀是月歸德陳州河決
九月戊申帝御壽甯宮受諸王百官賀聖誕庚申車駕
至自上都冬十月辛巳有事於太廟庚寅駙馬按替不
花自篤哇來歸乙未諭中書省樞密院御史台曰省中
事聽右丞相哈剌哈孫總裁自後用人非與哈剌哈孫
共議者悉罷之辛丑復以詳刑觀察司爲廉訪司十一
月丁未置南城警巡院庚午祀昊天上帝於南郊攝太
尉右丞相哈剌哈孫左丞相阿忽台御史大夫鐵古迭
而爲三獻官十二月丙子京師地震庚寅皇太子卒
十年春正月壬寅朔高麗國遣使貢方物甲辰詔訪莊

聖皇后昭睿順聖皇后徽仁裕聖皇后儀範中外之政以備紀錄丁卯封駙馬合伯爲昭武郡王營國子學閏月甲午前中書平章政事鐵哥江浙行省平章政事闍里河南行省平章政事阿散並爲中書平章政事行宣政院使張閻四川行省左丞杜思敬並爲中書左丞參議中書省事劉源爲中書參知政事二月丙辰封孛羅爲鎮甯王是月晉甯冀甯二路地震篤哇遣使來朝丁卯月古不花爲中書左丞戊辰車駕幸上都三月己卯崆古國遣使來貢方物乙未慮大都囚釋上都死罪三人夏四月庚子朔詔匿鷹犬者沒家貲之半壬戌雲南

行省平章政事也速帶而討羅雄州叛蠻獲其酋阿邦
龍斬之癸亥立崑山嘉定等處水軍上萬戶府五月辛
未京師旱乙酉同知樞密院事塔哥忽台塔刺海並知
樞密院事封駙馬鐵木而爲濮陽王公主忙歌台爲鄆
國大長公主丁亥詔右丞相哈刺哈孫左丞相阿忽台
等整飭庶政百司勤惰悉以名聞六月壬戌來安路總
管岑雄叛未幾遣其子來降復立淮西道肅政廉訪司
秋七月辛巳釋諸路罪囚凡常赦所不原者皆赦之八
月壬寅開成路地震壞官民廬舍無算壓死故秦王妃
也里完等五千餘人丁巳重修文宣王廟成行釋奠禮

九月壬申諸王篤哇遣使賀聖誕是月高麗國王王距入朝冬十月丁未有事於太廟丁卯安南國遣使貢方物十一月己巳車駕至上都丁亥武昌路火十二月乙卯帝不豫丙寅宣政使沙的等禱於太廟癸亥瓊州那蓬洞蠻酋王文何等作亂伏誅

十一年春正月丙寅朔帝大漸癸酉崩於玉德殿在位十有三年年四十有二乙亥葬起輦谷九月壬申上尊諡曰欽明廣孝皇帝廟號成宗國語曰完澤篤皇帝史臣曰成宗席前人之業因其成法而損益之析薪克荷帝無愧焉晚年寢疾不早決大計傳位武宗使易世

之後親貴相夷禍延母后悲夫以天子之尊而不能保
其妃匹豈非後世之殷鑒哉

新元史卷之十四終

本紀第十五

新元史卷之十五

賜進士出身日講起居注官翰林院侍讀國史館纂修膠州柯劭忞撰

武宗

武宗仁惠宣孝皇帝諱海山順宗答刺麻八拉第二子也順宗三子長曰魏王阿木哥其母微帝與仁宗皆昭獻元聖皇后宏吉刺氏所出所謂興聖皇太后也帝以至元十八年七月十九日生成宗大德三年命帝代甯遠王闊闊出鎮北邊禦叛王海都四年八月敗海都於闊別列之地五年海都率篤哇等大舉入寇八月朔與海都戰於鐵堅古山敗之越二日海都悉衆來攻大戰

於合刺合塔王師失利帝親冒矢石援諸王駙馬以出
明日復戰王師分五隊爲海都所乘帝突出敵陣之後
全師而返海都遁去旋病死八年十月封懷甯王賜金
印食瑞州六萬五千戶歲給五戶絲及幣帛千匹九年
七月置王府官時海都子察八兒擁其父衆雖納欵不
肯入朝十年七月帝自脫忽思圈之地追察八兒弟幹
羅思獲其妻孥輜重八月襲察八兒於也兒的石河盡
俘其衆察八兒奔於篤哇諸王明里鐵木兒阿魯灰等
悉降冬駐於按台山擊察八兒弟禿曲滅走之北邊悉
平十一年春正月成宗崩左丞相阿忽台等潛謀推成

宗皇后伯牙吾氏稱制以安西王阿難答輔之皇弟愛育黎拔力八達奉興聖太后入定內難執阿忽台等殺之遣使迎帝於北邊既而太后意猶豫使日者推帝及皇弟之星命問所宜立曰重光大荒落有災旃蒙作噩祚久重光帝年幹旃蒙皇弟年幹也太后感其言遣近侍托爾諭帝曰者所言運祚修短不可不思是時帝已至和林謂康里脫脫曰我扞禦邊陲勤勞十年又位居嫡長神器應歸於我今太后以星命休咎爲言天道茫昧安能豫知此殆任事之臣造奸謀以惑聖聽耳汝爲我往察之康里脫脫旣行帝率大軍由西道使諸王昂

哈由中道床兀兒由東道分趨上都康里脫脫入見太后述帝意太后愕然曰此我爲太子遠慮耳今諸王大臣議已定太子不速來何爲五月帝至上都皇弟奉太后來會左右部諸王畢至乃廢成宗皇后伯牙吾氏出居東安州執安西王阿難答至上都俱賜死甲申帝卽位受諸王百官朝賀於大安閣詔曰昔我太祖皇帝以武功定天下世祖皇帝以文德洽海內列聖相承丕衍無疆之祚朕自先朝撫軍朔方殆將十年親御甲冑力戰卻敵者屢矣方諸藩內附邊事以甯遠聞宮車宴駕迺有宗室諸王貴戚元勛相與定策於和林咸以朕爲

世祖會孫之嫡以功以賢宜登太寶朕謙讓未遑至於再三還至上都宗王大臣復請於朕間者姦臣乘隙謀爲不軌賴祖宗之靈母弟愛育黎拔力八達稟命太后恭行天罰內難旣平神器不可久虛合詞勸進誠意益堅朕勉徇輿情於五月二十一日卽皇帝位任大守重若涉淵冰屬嗣服之云初其與民而更始可大赦天下教育學校人才以備擢用係籍儒戶蠲免雜徭差役優恤北庭戰士仍禁管軍官輿魯官非理科擾經過軍馬牧養駝馬人等毋得擾民諸色人等勿得別投戶名影避差徭亦不得將土地妄詞呈獻優恤蒙古站赤仍禁

各投下濫給鋪馬義夫節婦孝子順孫具實以聞別加
恩賜上都大都隆興三路免差稅三年其餘路分量輕
重蠲免雲南八番田場地免差發一年並免積年逋
欠鰥寡孤獨不能自存者常加存問逃戶復業者免差
稅三年被災之處山場湖泊課稅權行停罷聽貧民采
取各處鐵冶聽人煽辦名山大川聖帝明王忠臣烈士
載在祀典者官吏擇日致祭其餘民間利害有合興修
者中書省核議奏聞是日追尊皇考答刺麻八拉爲皇
帝尊皇考元妃宏吉刺氏爲皇太后詔曰蓋聞孝治天
下者王政所先養以天下者尊稱爲大恭承先德寅紹

丕基愴昭考之長違賴慈闈之篤祐方衍無疆之慶曷
勝報本之情謹依先朝成憲追尊皇考曰皇帝尊太母
元妃曰皇太后其應行典禮以次舉行壬辰加知樞密
院事朶兒朶海太傅中書右丞相哈刺哈孫答刺罕太
保並錄軍國重事知樞密院事塔刺海爲中書左丞相
預樞密院宣徽院事同知徽政院事床兀兒也可札魯
忽赤阿沙不花江浙行省平章政事明里不花並爲中
書平章政事江浙行省左丞劉正爲中書左丞遙授中
書左丞欽察福建道宣慰使也先帖木兒並爲中書參
知政事中書右丞行御史中丞塔思不花爲御史大夫

平章政事床兀兒旋改知樞密院事特授乞台普濟中書平章政事延慶使抄兒赤同知和林等處宣慰司事塔海並爲中書右丞阿里爲中書左丞脫脫爲御史大夫是月勅高麗王王暉歸國平章政事撒勒帖木兒翰林學士郭貫鎮撫高麗中書平章政事合散出爲遼陽行省平章政事六月癸巳朔立皇弟愛育黎拔力八達爲皇太子受金寶詔曰朕承列聖之貽謀協宗王之翌戴必謹親賢之託共成繼述之功母弟愛育黎拔力八達性稟溫文行全孝敬夙著忠勤之節素明治理之方載惟靖亂之殊勛式符元良之渥命乃遵裕皇居東宮

舊制於六月朔旦授以皇太子寶俾領中書之務仍兼
宥密之司匪特篤兄弟友愛之情實以衍宗社隆昌之
福甲午建行宮於旺兀察都之地立爲中都丁酉上皇
考尊諡曰昭聖衍孝皇帝廟號順宗大行皇帝尊諡曰
欽明廣孝皇帝廟號成宗元妃宏吉刺氏失憐答里尊
諡曰貞慈靜懿皇后祔廟躋順宗於成宗之上己亥羅
羅斯宣慰使幹羅思爲中書左丞諸司聽皇太子各置
一人拱衛直都指揮使馬謀沙角解屢勝遙授平章政
事壬寅左丞相塔刺海加太保錄軍國重事兼太子太
師癸卯立詹事院甲辰平章政事行和林宣慰使都元

帥熬刺合兒通政使武備院卿帖木兒不花並知樞密院事戊申特授尙乘卿索蘭奚床兀兒並爲平章政事大同屯儲軍民總管府達魯花赤怯里朮丁爲中書右丞辛卯中書平章政事脫虎脫出爲江西行省平章政事王子封皇妹祥哥刺吉爲魯國大長公主駙馬瑯阿不刺爲魯王勅樞密院銓調軍官遵世祖定制近侍勿輒有請軍官許父子兄弟襲職近侍不得援以爲例丙辰御史大夫塔思不花脫脫並遙授左丞相戊午高麗前王王諫進封瀋陽王加開府儀同三司太子太傅上柱國駙馬都尉入中書省參議政事己未甯遠王闊闊

出進封甯王庚申遙授左丞相塔思不花爲右丞相七月癸亥朔封諸王禿剌爲越王甲子御史大夫鐵古迭兒等以卽位告天地於南郊丙寅前中書參知政事趙仁榮爲太子詹事太傅右丞相哈刺哈孫左丞相塔刺海綜理中書庶務己巳立宮師府壬申御史大夫鐵古迭兒等以卽位告太廟癸酉立和林行中書省太師月赤察兒爲行省右丞相中書右丞相哈刺哈孫爲左丞相依前太保錄軍國重事丙子江浙行省平章政事塔失海牙知樞密院事床兀兒並爲中書平章政事丁丑封諸王八不沙爲齊王朶列納爲濟王迭里哥兒不花

爲北甯王太師月赤察兒爲淇陽王加平章政事脫虎
脫太尉中書左丞相塔刺海爲中書右丞相御史大夫
塔思不花爲中書左丞相浙江行省平章政事教化河
南江北行省平章政事法忽魯丁並爲中書平章政事
平章政事鐵木迭兒出爲江西行省平章政事己卯集
賢院使別不花爲中書平章政事庚辰御史中丞只兒
合郎爲御史大夫辛巳加至聖文宣王尊號爲大成至
聖文宣王置行工部於中都同知樞密院事也兒吉尼
知樞密院事御史中丞王壽浙江行省左丞郝天挺並
爲中書右丞王午御史大夫鐵古迭兒等以卽位告社

稷甲申瞻思丁使西域丙戌同知宣徽院事孛羅答失
爲中書左丞中書參知政事欽察出爲四川行省左丞
辛卯勅唐兀秃魯花戶籍已定其入諸王駙馬部下避
役及冒匿者皆罪之八月甲午勅不由中書奏者勿與
官外任官勿帶相銜乙未治書侍御史兀伯都刺爲中
書參知政事戊戌封御史大夫脫脫秦國公辛亥中書
左丞孛羅帖木兒以國文譯孝經進詔曰此乃孔子之
微言自王公至於庶人皆當由是而行其命中書省刊
印諸王以下皆賜之丁巳中書左丞王壽罷爲御史中
丞戊午中書平章政事乞台普濟床兀兒別不花等並

加太尉中書右丞塔海加太尉平章政事中書左丞李
羅帖木兒爲中書右丞禁諸色人帶金翅雕帽頂九月
甲子車駕至自上都時巡狩三不刺翰林學士王文用
諫曰先帝新棄天下陛下巡狩不以時無以慰臣民之
望宜早還帝卽日還大都乙丑中書右丞相塔刺海攝
太尉請皇考皇帝大行皇帝尊諡於南郊辛未加塔刺
海塔思不花太尉壬申塔刺海奉冊寶上皇考及大行
皇帝尊諡廟號又上大行皇帝元妃宏吉刺氏尊諡祔
於太廟甲戌改太常寺爲太常禮儀院丁丑定中書省
官爲十二員右丞相塔刺海左丞相塔思不花平章政

事床兀兒乞台普濟如故阿沙不花塔失海牙爲平章
政事孛羅答失劉正爲右丞郝天挺也先帖木兒爲左
丞于璋兀伯都刺爲參知政事甲申立尙書省塔刺海
塔思不花仍領中書省脫虎脫教化法魯忽丁任尙書
省命日舉官屬丙戌中書平章政事別不花出爲江浙
行省平章政事辛卯御史臺臣諫立尙書省帝曰卿言
良是脫虎脫教化法魯忽丁此三臣願任其事姑聽之
冬十月壬寅封知樞密院事床兀兒爲容國公乙巳敕
陰陽法師勿謁諸王駙馬之門丙午詔整飭台綱封御
史大夫鐵古迭兒爲鄆國公中衛親軍都指揮使買奴

爲知樞密院事十一月癸亥鎮遠王牙忽都進封楚王
丙寅朝皇太后於隆福宮上册寶已巳詔中書省官十
二員脫虎脫仍爲宣政院教化留京師其餘各授職任
戊寅授皇太子玉冊已卯帝御大明殿受諸王百官賀
十二月辛丑幸大聖壽萬安寺吏部尙書察乃授平章
政事領工部事禁漢人挾弓箭彈弓庚申詔曰仰惟祖
宗應天順人肇啓疆宇華夏一統罔不率從逮朕嗣服
丕圖纘膺景命遵承遺訓恪慕洪規祇惕畏敬未知攸
濟永思創業艱難熒然軫念萬事之統在予一人間者
歲比不登流民未還是以責任股肱耳目大臣贊襄嘉

猷朝夕入告樂與率土之民共享治安之化邇甯遠肅
顧不韙歟可改大德十二年爲至大元年誕布維新之
令式符永固之休凡公事並經由中書省可否施行內
外大小衙門毋得隔越關奏監察御史廉訪司嚴糾內
外官吏年終考其殿最者一人以憑黜陟政令得失軍
民利病許人上書陳言若言無可采並無罪責如其可
取重加遷擢培養學校人才以備擢用其貢舉法中書
省續議舉行勸課農桑孝弟力田之人量加旌賞存恤
蒙古探馬赤各翼軍人及各翼漢軍管軍官舉放軍人
錢物詔書到日盡行除免典賣親丁悉聽圓聚價不追

還圍獵飛放毋得騷擾百姓驅戶毋得投充怯歹鷹房
子名色影避差徭站赤消乏仰中書省通政院先將戶
口合并截補管設頭目其整治事理次第舉行禁捕野
物地面除上都大同隆興三路外大都周圍各禁五百
里其餘禁斷處所及山場河泊蘆蕩並開禁一年聽民
採捕民戶流移所在官司勿與本管戶一體科徵其原
籍官司用心招誘毋侵占所拋田產內庭作佛事毋釋
重囚以輕囚代之岳鎮海瀆風師雨師雷師有司潔齋
致祭

至大元年春正月辛酉曲赦御史台見繫賊吏甲子中

書平章政事阿沙不花授右丞相行御史大夫丙寅罷
江南行都水監丁卯中書右丞也罕的斤爲平章政事
議陝西行省事己巳緬國進馴象六己丑雲南王也先
帖木兒進封營王是月召前中書右丞尙文至京師以
疾辭二月甲辰立皇太子衛率府戊午不達達思等送
爪哇使歸其國是月中書平章政事乞台普濟爲中書
左丞相三月戊寅車駕幸上都封阿沙不花爲康國公
甘肅行省右丞脫脫木兒爲中書平章政事加大司徒
己卯修順宗成宗實錄勅怯薛歹昔寶赤諸王駙馬部
下勿踐百姓田禾犯者罪之夏四月戊戌以永平路鹽

課賜桑哥刺失公主中書省臣執不可從之封三寶奴
爲渤海國公香山爲賓國公加鐵古迭兒右丞相都護買
住中書右丞癸卯加平章政事教化太子太保太尉平
章軍國重事封魏國公甲辰知樞密院事也見吉尼遙
授右丞相乙卯米楫等使蘇魯國丙辰罷征東行中書
省五月丙寅知樞密院事塔魯忽台遙授右丞相己巳
緬國進馴象六乙亥知樞密院事熬刺合兒遙授左丞
相丙子禁白蓮社放其人隸民籍加右丞相塔思不花
上柱國左丞相乞台普濟太子太傅甲申立大同侍衛
親軍都指揮使司六月己丑加三寶奴錄軍國重事曲

出太子太保脫虎脫上柱國太尉大慈都平章軍國重
事戊戌威定王藥木忽兒進封定王封駙馬阿失爲昌
王宦者李邦甯遙授左丞相己酉乞台普濟錄軍國重
事勅無照會官不得赴任七月庚申立廣武康里侍衛
親軍都指揮使司壬戌立中都留守司兼開甯路總管
府王申塔察兒等九人使諸王寬闔月魯等十二人使
諸王脫脫癸酉禮部尙書阿里灰等賚璽書諭安南國
禮部侍郎管祝思監等使緬國脫里不花等十二人使
諸王合兒班答壬午封乃蠻帶爲壽王是月詔中書右
丞相塔思不花左丞相乞台普濟日中書政本也軍國

之務小大由之朕自卽位以來勵精求治爰立輔相以
總中書期年於茲大效未著豈選用之未當歟何萬機
之猶繁而羣生之寡遂也今特命塔思不花爲中書右
丞相乞台普濟爲左丞相統百官平庶政便者舉行弊
者革去一新條理諸內外大小事務並聽中書省區處
奏聞違者罪之八月戊申特授瓜頭太師九月丙辰高
麗國王王暉卒雪尼台等使薛思迷干部辛酉諭諸王
察八兒寬閣入朝乙亥車駕至自上都庚辰冊王諫爲
征東行省右丞相嗣高麗國王依前駙馬都尉瀋陽王
封諸王禿滿爲陽翟王冬十月甲午阿沙不花知樞密

院事敕持內降文書買河間路鹽及以諸王駙馬命至
運司者一切禁之甲辰加左丞相知樞密院事帖木兒
不花錄軍國重事中書右丞禿忽魯河南行省右丞也
速內史脫孛花並知樞密院事十一月丁卯知樞密院
事也兒吉尼爲御史大夫己巳塔思不花乞合普濟並
爲中書右丞相脫虎脫爲左丞相壬申高麗國王王諫
來朝是月覈天下屯田閏月甲寅太傅達刺罕哈刺哈
孫卒十二月庚申封和郎撒爲隴王甲戌平章政事太
子賓客王大亨行太子詹事平章軍國重事太子少詹
事大藏都爲太子詹事

二年春正月己丑從皇太子請罷宮師府庚寅殺越王
禿刺辛卯皇太子率諸王百官上尊號曰統天繼聖欽
文英武大章孝皇帝乙未以上尊號謝太廟己亥容國
公床兀兒進封句容郡王丙申詔曰朕荷三靈之隆眷
承列聖之不基永言置器之艱恆切履霜之懼迺者皇
太子率中外臣庶僉謂撫軍十載遐邇悉平當此九重
成規具舉若稽舊典盍進徽稱豈朕躬之克當惟祖武
之顯式已於正月十七日御大明殿受統天繼聖欽文
英武大章孝皇帝之號越五日躬詣太室謝訖爰念卽
位之初恆以賑災恤民爲務而恩澤猶未溥博流離猶

未安集豈有司奉行之不至歟今特命中書省遴選內
外官僚專以撫治爲事簡汰冗員摶節浮費官吏各修
乃職勸農桑興學校撫字百姓嚴戢吏胥御史廉訪司
年終每道考其殿最者一人以憑黜陟圍獵飛放及過
往屯戍出使人等擾害百姓有司再行禁戢災區經賑
濟百姓本年腹路差稅江淮夏稅並行蠲免本年正月
以前民間逋欠差稅課程並行蠲免鰥寡孤獨不能自
存者除常例外每名給中統鈔十五兩禁捕野獸地面
除上都中都大同三路及大都周圍五百里外其餘再
弛禁一年諸位下占據山場河泊關津橋梁並抽分等

錢盡行革罷檢視流民計口贍濟其還鄉者量給行糧流民合納差稅勿令見戶包納岳瀆帝王及忠臣烈士載於祀典者有司蠲潔致祭大小職官四品以下普覃散官一等二月癸亥罷行泉府院歸市舶於行省三月己丑遼陽行省右丞洪重喜告高麗國王王諫不法敕王諫從皇太后幸五台山勿令辨對諸王老章代梁王松山鎮雲南庚寅車駕幸上都封諸王也速不干爲襄甯王己亥封阿刺的納八剌公主爲趙國公主駙馬注安爲趙王夏四月辛酉立興聖宮江淮財賦總管府癸亥立鎮守海口屯儲親軍都指揮使司五月丁亥通政

院使慙刺合兒爲知樞密院事督建興聖宮大都留守
養安等董其役六月甲戌革歐西番僧者斷手詈者斷
舌之合秋七月癸未河決歸德府壬辰改四川松潘威
茂等州安撫司爲宣撫司移治茂州汶川縣己亥河決
封邱縣八月癸酉立尙書省乞台普濟爲尙書省右丞
相脫虎脫爲左丞相三寶奴伯顏也速爲平章政事保
八爲右丞忙哥帖木兒爲左丞王羆爲參知政事
中書左丞劉楫授尙書左丞商議尙書省事甲寅海刺孫授
平章政事商議樞密院事己未立皇太子左衛率府江
西行省參知政事郝彬爲尙書省參知政事甲戌賜太

師瓜頭名脫爾赤顏丁丑詔天下敢有沮撓尙書省事者罪之九月庚辰朔頒尙書省條畫於天下改各行中書省爲行尙書省詔朝廷得失軍民有上言者得實封上聞飢民復業者一切逋欠並行蠲免仍除差稅三年中外吏員依世祖皇帝定例以九十日爲滿如有子證父奴訐主及妻妾弟姪干犯名義者一切禁之頒行至大銀鈔壬寅追奪前平章政事教化魏國公爵丙戌車駕至自上都丙申占八國遣使貢白面象伽藍木禿堅張也先伯顏使不憐八孫國薛徹兀李唐徐伯顏使八昔國察罕亦不刺金楊呼答兒阿里使占八國陝西行

台御史大夫沙的授左丞相行土番等處宣慰使都元帥冬十月庚戌朔皇太子爲尙書令頒行銅錢法癸亥翰林學士承旨不里牙敦爲御史大夫乙丑以皇太后不豫釋天下大辟囚百人丁卯御史大夫只見合郎中書左丞相脫虎脫尙服院使大悲都並爲知樞密院事癸酉知樞密院事秃忽魯加左丞相丁丑遼陽行省平章政事合散爲左丞相行中書平章政事行中書參知政事伯都爲平章政事行中書右丞商議中書省事忽都不丁爲右丞行中書左丞參議中書省事帖里脫歡賈鈞並中書參知政事是月杖流洪重喜於潮州十一月

庚辰雲南行省右丞算只兒威招諭蠻酋谷保等受谷保賂復進兵失利詔嚴鞠其罪已而釋之乙酉詔冬至祀南郊以太祖皇帝配明年夏至祀北郊以世祖皇帝配丁亥湖廣行省左丞散朮帶爲平章政事商議樞密院事丙午諸王孛蘭奚坐私怨殺人杖流北邊是月中書參知政事賈鈞僉知樞密院事十二月乙卯有事於太廟上太祖聖武皇帝尊諡曰法天啓運聖武皇帝光獻皇后尊諡曰光獻翼聖皇后睿宗莊聖皇后尊諡曰顯懿莊聖皇后和林行省右丞囊家帶擅至京師詔鎖囊家帶至和林鞠之丁丑增百官俸定流官封贈格內

外官三品以上者許請諡賜諡不在此例是年常豐洞蠻叛率洗土不見散毛諸洞蠻寇永甯路

三年春正月癸未汰中書省官吏一百八十一員聽尙書省遷敘乙酉特授李孟平章政事集賢大學士同知徽政院事辛卯立宏吉刺氏爲皇后脫虎脫攝太尉授皇后寶冊戊戌勅湖廣行省招諭叛蠻黃勝許辛丑萬戶移刺四奴討湖廣乖西帶叛蠻聽其便宜調遣壬寅雲南行省右丞算只兒威招諭八百媳婦乙巳定樞密院知院七員同知院事二員副使二員僉院事二員同僉院事一員御史台增御史大夫中丞侍御史治書侍

御史各二員丁未立右衛阿速親軍都指揮使司二月
庚戌以皇后受冊寶告謝太廟己未商議尙書省事劉
楫整頓鈔法甲子以上皇太后尊號告祀南郊乙丑僉
樞密院事賈鈞復爲中書參知政事己巳甯王闊闊出
與越王禿刺子阿刺納失里等謀反事覺闊闊出下獄
賜其妻完者死竄阿刺失里於伯鐵木兒分地磔畏兀
僧鐵里等於市三寶奴賜號答刺罕餘並晉秩二等辛
未加脫克赤顏錄軍國重事壬申尙書平章政事樂實
遙授左丞相封齊國公癸酉左丞相行中書省平章政
事合散商議遼陽行省事甲戌以上皇太后徽號告祀

太廟是月詔太司農司總天下農政定奪黜陟三月乙酉知樞密院事只兒合郎爲陝西行尙書省平章政事壬辰車駕幸上都回回人木八刺等坐妖言伏誅夏四月己酉容美洞蠻叛高麗國王王諫加號純誠守正推忠宣力定遠保節功臣五月甲申封諸王完者爲衛王乙未尙書參知政事王巽加大司徒六月丁未朔詔太尉尙書右丞相脫虎脫太保尙書右丞相三寶奴總治百司庶務並從尙書省奏行戊申中書左丞忽都不丁爲中書右丞甲子太子詹事幹赤爲中書左丞壬申以西北叛王察八兒等來朝告祀太廟賜脫虎脫三寶奴

珠衣封三寶奴爲楚國公是月荆門州大水山崩死者
三千四百餘人秋七月封晉王長女寶塔失憐爲韓國
長公主八月丁未浙江行省左丞相呼剌出遙授中書
右丞相釐日並爲御史大夫甲子畋於昂兀腦兒九月
己卯平伐蠻酋不老丁來降辛己立宣慰司都元帥府
於察罕腦兒丙戌車駕至自上都尙書右丞保八遙授
平章政事是月流甯王闊闊出於高麗冬十月戊申帝
率皇太子諸王羣臣朝興聖宮上皇太后尊號曰儀天
興聖慈仁昭懿壽元皇太后庚戌告謝太廟辛酉大赦
天下大都上都中都免至大三年秋稅其餘諸路今歲

被災人口曾經體覆者依上蠲免內外不急之役截日
停罷至大二年前負欠差稅課程並行蠲免闊闊出
餘黨未發覺者並原其罪官民田土諸人勿得陳獻諸
收取錢物者許實訴丁卯封駙馬買住韓爲袞王壬申
馬合謀但的遙授尙書右丞爲海外諸番宣慰使都元
帥領海道運糧漕運萬戶府事丞相鐵古迭兒爲陝西
行台御史大夫十一月辛巳脫虎脫進太師錄軍國重
事封義國公戊子容美蠻酋田墨施什用等來降丙申
有事於南郊尊太祖皇帝配享昊天上帝己亥殺武衛
親軍都指揮使鄭阿思蘭籍其家十二月甲辰朔以建

大崇恩福元寺乞其刺遙授左丞曲列劉良遙授參知
政事並領行工部事已未鎮南王老章坐僭擬乘輿召
赴京師

四年春正月癸酉朔帝不豫大赦天下庚辰帝崩於玉
德殿在位四年年三十有一壬午葬起輦谷夏六月甲
子上尊諡曰仁惠宣孝皇帝廟號武宗國語曰曲律皇
帝

史臣曰武宗舍其子而立仁宗與宋宣公舍與夷而立
穆公無以異公羊子曰宋之亂宣公爲之然則英宗之
弒文宗之篡奪亦帝爲之歟春秋貴讓而不貴爭公羊

子之言過矣帝享國日淺濫恩倖賞無一善之可書獨
傳位仁宗不愧孝友其流祚於子孫宜哉

新元史卷之十五終

親之見老四日 子系

十一

本紀第十六

新元史卷之十六

賜進士出身日講起居注官翰林院侍讀國史館纂修膠州柯劭忞撰

仁宗上

仁宗聖文欽孝皇帝諱愛育黎拔力八達順宗第三子武宗同母弟也以至元二十二年三月丙子生大德九年冬十月成宗不豫皇后伯牙吾氏出帝與興聖皇太后居懷州十年冬十二月帝至懷州所過屏供張戒飭扈從之士毋擾累郡縣民皆感悅十一年春正月癸酉成宗崩戊子帝與皇太后赴喪二月辛亥至大都入臨出居舊邸時安西王阿難答諸王明里帖木兒已先至

中書左丞相阿忽台平章政事八都馬辛前中書平章政事伯顏中政院使怯烈道興等潛謀推皇后稱制以阿難答輔之三月乙卯朔阿忽台等請皇后以丁巳日垂簾自右丞相哈刺合孫以下皆列牘署名丙辰帝率衛士入宮召阿忽台等責以亂祖宗舊制執之戊辰殺左丞相阿忽台平章政事八都馬辛中政院使怯烈道興等甯王闊闊出楚王牙忽都進曰今內難已平太子世祖之孫宜早正大位帝曰王何爲出此言奸臣搆亂故誅之吾豈欲覬覦神器耶懷甯王吾兄宜入承大統乃遣使迎武宗於北邊帝以太子監國武宗遲回不至

夏五月乙丑帝奉皇太后幸上都率左右部諸王勸進武宗卽位六月癸巳立帝爲皇太子受金寶帝遣使求經籍有進大學衍義者命詹事丞王約等節而譯之帝曰治天下此一書足矣命與圖像孝經列女傳並刊布天下十一月戊寅受玉冊領中書省樞密院至大二年八月立尙書省詔帝兼尙書令詹事院啓金州獻瑟瑟洞請采之帝曰吾以賢爲寶瑟瑟何用若此者後勿復言淮東宣慰使撒都獻玉觀音七寶帽頂寶帶寶鞍俱卻之四年春正月庚辰武宗崩壬午罷尙書省命中書右丞相塔思不花知樞密院事鐵木兒不花等參鞫尙

書右丞相脫虎脫左丞相三寶奴平章政事樂實右丞
保八左丞忙哥帖木兒參知政事王罷罪狀丙戌脫虎
脫三寶奴樂實保八王罷俱伏誅杖流忙哥帖木兒於
海南流平章政事速思不花於高麗壬辰詔世祖舊臣
前平章政事程鵬飛董世選太子少傅李謙少保張驢
中書右丞陳天祥尙文劉正中書左丞郝天挺御史中
丞董士珍太子賓客蕭欒參知政事劉敏中王思廉韓
從益侍御史趙君信廉訪使程鉅夫杭州達魯花赤阿
合馬乘傳至京師咨以庶政丁酉雲南行省左丞相鐵
木迭兒爲中書右丞相太子詹事完者集賢大學士李

孟並爲中書平章政事戊戌中書右丞相塔思不花徽
政院使沙沙並爲御史大夫己亥改尙書行省仍爲中
書行省庚子停各處營造罷廣武喀刺衛萬戶等府辛
丑塔失鐵木兒知樞密院事二月乙巳命和林浙江二
行省依前設左丞相餘省但置平章政事辛亥禁諸王
駙馬擅據山場聽民樵采罷阿老瓦丁買賣浙鹽供中
政院食羊禁宣政院違制度僧人甲寅罷江南行通政
院行宣政院甲子命中書平章政事李孟領國子監丙
寅陝西行省平章政事孛羅帖木兒江浙行省平章政
事烏馬兒甘肅行省平章政事闊里吉思河南行省參

知政事塔失帖木兒江浙行省參知政事萬僧坐前任
贓罪及挾勢害民俱免官庚午思州蠻酋楊正思等來
朝賜金帛有差是月中書左丞相康里脫脫罷爲江浙
行省左丞相三月庚辰詔前樞密副使吳元珪前中書
左丞拜降前陝西行省右丞兀伯都刺至京師同諸老
臣議事丙戌罷五臺山行工部己丑命毋赦謀反大逆
殺祖父母父母妻妾殺夫奴婢殺主等罪庚寅卽皇帝
位於大明殿受諸王百官朝賀詔曰惟昔先帝事皇太
后撫朕眇躬孝友天至踐祚曾未踰月授朕皇太子寶
領中書令樞密使百揆機務悉聽總裁於今五年先帝

奄棄天下勛戚元老咸謂大寶之承既有成命非與前
聖賓天而始徵集宗親議所宜立者比當稽前代故事
卽正宸極朕以國恤方新誠有未忍是用經時今則上
奉皇太后之命下徇諸王勸進之誠三月十八日於大
都大明殿卽皇帝位凡尙書省誤國之臣先已伏誅同
惡之徒亦已放殛百司庶政悉歸中書命丞相鐵木迭
兒平章政事完者李道復等從新按治可大赦天下敢
以前赦事相告者以其罪罪之其可爲法程拯民者具
如左方一凡制詔號令錢糧選法刑名一切政務並從
中書省聞奏區處敢有擅自奏請者以違制論一內外

百司其清慎公勤五事備具者優加遷擢有貪污敗事者陳告得實依條斷罪一庶事更張圖治伊始式遵世祖皇帝成憲仰中書省參酌舉行一凡言軍民利病政事得失有可采者量加旌擢如不可采亦無罪譴一仰提調官申明累降條畫勸課農桑經過軍馬及昔寶赤探馬赤等毋得索取飲食芻藁縱放頭匹一康里軍衛已罷上項屯軍悉聽放還其各處軍馬陣亡病死者常例存恤外各加一半雲南等處新附漢軍每名給布一匹一各投下諸色人等不得擅招戶計誘占奴婢違者治罪一站赤消乏除海青外應進獻鷹犬並令止罷毋

給諸王駙馬投下及各衙門鋪馬一陳獻地土及山場
審治之人並行治罪一此者寶合丁乞兒八答私買所
盜內府寶帶旣已伏誅今後諸人毋得似前申獻一民
間和雇和買一切雜泛差役除軍人並大都至上都自
備站戶外其餘不論是何戶計一體均當一恢辦商稅
課租並遵舊制法外多取及欺盜入己者依例究治一
營築中都已令停罷其餘不急之役截日停止一鰥寡
孤獨廢疾無卹者除常例外每人給至元鈔一貫一名
山大川聖帝明王忠臣烈士凡在祀典者次第加封除
常祀外主者施行一韓脫因不花唐華鄭阿思蘭等已

拔都兒左丞相知樞密院事鐵木兒不花並錄軍國重
事知樞密院事也速兼山東河北蒙古軍都萬戶也先
帖木兒仁虞院事也兒吉尼太子詹事月魯帖木兒並
知樞密院事夏四月戊申以卽位告天地於南郊丁巳
罷中政院戊午以卽位告於太廟辛酉敕國子監師儒
之職有才德者不拘品級選用乙丑封知樞密院事鐵
木兒不花爲宣甯郡王丁卯詔曰朕惟食貨生民之本
權以幣帛先在適時我世祖皇帝參酌古今立中統至
元鈔法天下流行公私蒙利五十年於茲矣此者尙書
省不究利病輒意變更旣創至大銀鈔又鑄大銅錢鈔

以倍數太多輕重失宜錢以鼓鑄弗給新舊滯用曾未
再期其弊滋甚爰咨廷議允協輿言皆願變通以復舊
制其罷資國院及各處泉貨監提舉司買賣銅器聽民
自便應尙書省已發各處至大鈔本及至大銅錢截日
封貯民間行使者赴行用庫倒換有司依舊印造中統
鈔子母並行以便民用改封北甯王帖里哥兒不花爲
湘甯王革僧道也里可溫答失蠻白雲宗頭陀教等各
衙門免差發五月癸酉八百媳婦及大小車里蠻俱叛
命雲南王及行省右丞阿忽台討之丙子命翰林國史
院修大行皇帝實錄及累朝皇后功臣列傳壬午金齒

蠻來獻馴象戊子羅鬼蠻來獻方物六月乙巳命侍臣
咨訪內外才堪信用者悉以名聞仍戒飭諸王恪恭乃
職甲寅封亦思丹爲懷仁郡王丁巳命和林行省右丞
孛里馬速思經理青海屯田己未封知樞密院事孛羅
爲澤國公甲子請大行皇帝諡於南郊上尊諡曰仁惠
宣孝皇帝廟號武宗己巳魏王阿木哥入朝命翰林侍
講阿林鐵木兒以國語譯貞觀政要使蒙古色目人誦
習之秋七月癸未甘州地震大風有聲如雷己亥詔諭
中書省曰朕前戒近侍母輒以文記傳旨中書自今敢
有犯者不須奏開直捕其人付刑部究治勅御史臺選

老成更事者爲監察御史閏七月辛丑遣國子祭酒劉
賡至曲阜以太牢祀孔子丙午祔武宗皇帝於太廟戊
申封李孟秦國公亦憐眞乞刺思爲司徒己酉吐蕃寇
禮店文州命亦憐眞等討之壬戌立上都通政院領蒙
古諸驛乙丑魯國大長公主祥哥刺吉進號皇姊大長
公主遣使招諭黑水白水等蠻八月己巳朔裁京官諸
司員額並依至元三十年舊制丙戌安南世子陳日養
來貢方物九月己亥朔遙授左丞相不花進太尉壬子
改元皇慶詔曰朕賴天地祖宗之靈纂承聖緒永惟治
古之隆羣生成遂國以乂甯朕夙興夜寐不敢怠遑任

賢使能興滯補弊庶其臻茲斂時五福用敷錫厥庶民
朕之志也踰年改元厥有彝典其以至大五年爲皇慶
元年是月遣都水監木八刺沙往取杭州所造龍舟中
書省臣諫曰陛下踐阼誕告天下凡非宜取索勿得擅
進若取此舟有乖前旨詔止之冬十月戊辰朔有事於
太廟丁丑禁僧寺勿冒占民田戊子以故太師月兒魯
那演子木刺忽知樞密院事壬辰議收至太銀鈔十一
月戊戌封司徒買僧爲趙國公辛亥諸王不里牙敦等
誣告八不沙不法詔竄不里牙敦於河南己未遼陽行
省平章政事阿散爲中書平章政事丙寅加徽政使羅

源大司徒十二月癸酉封宣政使愛薛秦國公壬午詔
曰今歲不登民何以堪春蒐其勿令供億甲申占城國
遣使貢方物庚寅曲赦京師大辟囚一人并流罪乙未
敕內降旨一切勿行遣禮部尙書乃馬台等頒皇慶元
年歷於安南國

皇慶元年春正月戊戌朔召河南行省右丞王約至京
師庚子帝諭御史大夫塔思不花曰凡大臣不法卿等
劾奏勿避朕自裁之加太師錄軍國重事知樞密院脫
兒赤顏開府儀同三司封淇陽王庚戌封知樞密院事
駙馬醜漢爲安遠王出總北軍癸丑旌表廣州路番禺

縣孝子陳韶孫戊午改封濟王朶列納爲吳王崇福使也里牙襲封秦國公是月以中書平章政事李孟爲翰林學士承旨知制誥仍兼平章政事二月甲戌改和林行省爲嶺北行省己卯八百媳婦蠻來獻馴象壬午封孛羅爲永豐郡王三月己亥以帝生日爲天壽節高麗國遣使來賀聖誕戊申前河南行省平章政事塔失海牙爲御史大夫甲寅諸王也先不花等遣使來貢方物丙辰封同知徽政院事不蘭奚爲趙國公庚申遣戶部尙書馬兒經理河南屯田乙丑封諸王塔思不花爲恩平王夏四月癸酉車駕辛上都封鄆國大長公主忙哥

台爲大長公主壬午封知樞密事木剌忽爲廣平王五月丙申朔中書平章政事阿散爲中書左丞相江浙行省平章政事張驢爲中書平章政事加知樞密院事也先帖木兒開府儀同三司六月乙丑朔日有食之丁卯天雨毛己未京師地震丁亥敕罷封贈戒左右勿僥倖加官秋七月丙午中書參知政事賈鈞乞病歸賜鈔三百錠給安車還籍八月己卯吏部尙書許師敬爲中書參知政事庚辰車駕至自上都辛卯安南國王陳益稷來朝九月戊戌罷討八百媳婦及大小車里以璽書招諭之辛丑遣司徒田忠良等至眞正府玉華宮祀睿宗

御容八百媳婦及大小車里蠻來獻方物甲辰參議中
書省事阿里海涯爲參知政事冬十月甲子有事於太
廟癸未中書參知政事察罕加平章政事商議中書省
事戊子翰林學士承旨玉連赤不花等進順宗成宗武
宗實錄辛卯以諸王入覲赦天下敢以赦前事相告者
以其罪罪之十一月丙午諭六部官毋踰越奏事丙辰
晉封濮陽王駙馬脫脫木兒爲岐王庚申占城國來獻
犀象緬國遣使來朝雲南不農蠻酋岑福來朝十二月
癸亥中書平章政事李孟致仕樞密副使張珪爲中書
平章政事庚辰知樞密院事答失蠻罷丁亥遣使祈雪

於社稷及嶽鎮海瀆定省部減削繁冗格例是月諸王春丹叛黎賊王奴歐等作亂僞稱平章元帥

二年春正月甲午察罕腦兒等處宣慰使伯忽爲御史大夫辛丑封乞合普濟爲安吉王中書右丞相鐵木迭兒以病免丁未太府卿禿忽魯爲中書右丞相是月黎賊王奴歐降二月甲子立宏吉刺氏爲皇后遣使祭告天地太廟丁丑命張珪領國子學丁亥帝諭左右曰回回人以寶玉鬻於官朕思此物何足爲寶惟善人乃可爲寶善人用則國家安此朕所宜寶也三月丙申御史中丞脫歡答刺罕爲御史大夫杖流高麗陪臣李思溫

金深於臨洮丙午詔曰易述家人詩美關雎故帝王受命必建置后妃所以順天地之義重人倫之本也宏吉刺氏夙由世戚來嫁我家事皇太后有孝恭之懿輔朕躬着淑慎之善於二月十六日授以冊寶立爲皇后於戲位乎內位乎外得政道之相成用之國用之鄉庶民風之不變咨爾有衆咸使聞知王子右丞相禿忽魯等以天時亢旱又隕霜雨沙乞黜免以當天意帝不允甲辰高麗王王諫以長子燾入覲請傳位於燾詔授燾征東行省左丞相上柱國襲封高麗國王夏四月丙戌遣納刺忽等護送高麗王諫歸國乙亥車駕幸上都辛巳

加御史大夫伯忽開府儀同三司五月辛丑中書右丞兀伯都刺爲平章政事左丞八刺脫因爲右丞參知政事阿里海牙爲左丞參議中書省事秃魯花帖木兒爲參知政事是月中書平章政事張珪罷爲大司徒六月己未京師地震癸亥秃忽魯等以災異乞賜放黜不允丙寅京師地震辛未以參知政事許師敬綱領國子學甲申以宋儒周敦頤程顥程頤張載邵雍司馬光朱熹張栻呂祖謙及前中書左丞許衡從祀孔子廟廷河決陳亳睢等州及開封陳留縣秋七月壬寅京師地震八月丁卯車駕至自上都庚午侍御史薛居敬爲中書參

知政事是月崇明嘉定二州海溢九月癸巳宣徽院使
完者知樞密院事戊申封脫歡爲安定王冬十月己卯
敕中書省議科舉法封不答里爲安德王乙酉旌表高
州民蕭又妻毛氏貞節十一月甲辰詔曰惟我祖宗以
神武定天下世祖皇帝設官分職徵用儒雅崇學校爲
育才之地設科舉爲去取之方規模宏遠矣朕以眇躬
獲承丕祚繼志述事祖訓是式若稽三代以來取士各
有科目要其本末舉人宜以德行爲首試藝則以經術
爲先詞章次之浮華過實朕所不取爰命中書參酌古
今定其條制其以皇慶三年八月天下郡縣舉其賢者

能者充賦有司次年三月會試京師中選者朕將親策
焉是月辰州蠻酋吳千道作亂十二月丙子定百官致
仕資格

新元史卷之十六終

本紀第十七

新元史卷之十七

賜進士出身日講起居注官翰林院侍讀國史館纂修膠州柯劭忞撰

仁宗下

延祐元年春正月丁亥授前中書右丞劉正平章政事
商議中書省事庚子江浙行省左丞高昉爲中書參知
政事丁未詔曰惟天惟祖宗眷佑有國朕自卽位於今
四年比者陰陽失和災異屢見豈朕修德之未至歟抑
官吏未選而政令之或非歟思以回天心召和氣側身
修行實切朕衷庸勅有司務共乃職爰布維新之令誕
敷濟衆之仁可改皇慶三年爲延祐元年所有合行事

理條列於後一上都大都差稅自延祐元年蠲免二年
一曾經賑濟災戶免延祐元年差稅一內外一切不急
之役截日停罷一普免百姓欠負錢糧一流民所至有
司勤加存恤復免差役三年原拋田產盡行給復一除
謀反大逆謀殺祖父母父母妻妾殺夫奴僕殺主及強
盜僞造寶鈔官吏侵盜錢糧不在原宥外其餘一切罪
犯並行釋放一湖廣雲南叛蠻如能悔過卽與免罪於
戲以實應天爰聿新於庶政用孚有衆同保合於太和
咨爾多方體予至意庚戌右丞相禿忽魯等以災變乞
罷黜不允二月甲戌侍御史趙世延爲中書參知政事

壬午右丞相禿忽魯罷阿散爲中書右丞相監修國史
癸未中書參知政事高昉罷爲集賢大學士三月癸卯
暹國來貢方物丙午封駙馬阿魯禿爲趙王戊申車駕
幸上都癸丑中書參知政事察罕致仕是月沅州獠賊
蒲狗向金朝等來降閏三月丁丑馬八兒國來貢方物
夏四月己酉勅郡縣官勤職者賜幣帛以鐵木迭兒錄
軍國重事監修國史立回回國子監是月皇后宏吉刺
氏崩五月戊寅京兆府爲許衡建魯齋書院降璽書旌
之六月戊子召河南行省左丞相卜憐吉歹至京師封
爲河南王秋七月庚午開下番市舶禁是月遣使賜高

吏命中書省臣分領庶務禁南人販買妻子爲驅是月
黃聖許復叛陷忠州二月己卯朔會試進士於禮部壬
寅雲南王老的來朝三月己卯廷試進士賜忽都答兒
張起巖等五十六人及第出身有差庚午上皇太后尊
號曰儀天興聖慈仁明懿壽元合德泰甯福慶皇太后
免延祐二年四月初一日以前百姓拖欠課稅官吏失
陷短少錢糧亦與免徵丁丑中書平章政事張驢出爲
江浙行省平章政事夏四月戊寅朔日有食之辛巳賜
進士恩榮宴於翰林院辛丑賜會試下第舉人從七品
官致仕及教授學正山長等有差後不爲例乙巳車駕

幸上都丙午封諸王察八兒爲汝甯王五月戊申朔復立陝西行御史臺乙丑秦州成紀縣山移陷沒民居甲戌授宦者續元暉昭文館大學士六月戊戌河決鄭州丙午緬國王遣其子脫刺合來貢方物秋七月乙卯贛州賊蔡五九等作亂自稱洞王己丑命鐵木迭兒總宣政院事詔諭中外八月丙戌蔡五九陷汀州甯化縣僭號蔡王遣江浙行省平章政事張驢等討之己丑車駕至自上都乙未以蔡五九之亂罷江浙經理田賦及冒括田租壬寅詔江浙行省印農桑輯要萬部頒行各路旌表貴州達魯花赤相兀孫妻脫脫眞死節九月丁未

勅吏部尙書王居仁鞠張驢括江浙田租逼死九人之
罪壬戌蔡五九伏誅冬十月丁丑封托忽赤爲威甯郡
王忽兒赤帖木兒不花爲趙國公庚辰淮西廉訪使郭
貫爲中書參知政事壬午有事於太廟乙未以同知樞
密院事帖木兒脫知樞密院事授白雲宗道人沈明仁
榮祿大夫司空丁酉加鐵木迭兒太師癸卯八百媳婦
蠻來貢馴象十一月丙午彗星見辛未以星變赦天下
免民間拖欠差稅大都上都興和三路免差稅三年其
餘路分輕重減免有差甲戌封武宗長子和世琜爲周
王左丞相阿散等以星變乞罷黜帝曰此朕之過豈卿

等所致其復乃職苟政有差謬勿憚更改以安百姓十
二月庚寅旌表汀州甯化縣民賴祿孫孝行是月廣東
黎賊陷橫州永淳縣殺達魯花赤

三年春正月乙巳特授昔寶赤合刺合孫達魯花赤脫
歡金紫光祿大夫太尉丙午封前左丞相忽魯答兒壽
國公辛酉以同知樞密院事買闕知樞密院事是月高
麗國王王壽來朝二月戊寅命湖廣行省諭安南歸占
城國王三月辛亥授高麗世子王暘開府儀同三司封
潘王加將作院使呂天麟大司徒甲寅命中書右丞蕭
拜住等護送周王和世琜之雲南癸亥車駕幸上都是

月德慶路獠叛夏四月壬午勅衛輝昌平官吏修殷比
干唐狄仁傑祠庚子上都留守憨刺合兒知樞密院事
五月辛亥江西行省右丞幹赤爲典瑞院使大司徒庚
申大都留守伯鐵木兒中書右丞蕭拜住並爲中書平
章政事左丞阿里海牙爲右丞參知政事郭貫爲左丞
參議不花爲參知政事六月乙亥封孟子父爲邾國公
母爲邾國宣獻夫人丙子橫融賓柳等州獠叛己卯詔
諭百官各勤其職毋隳廢庶政秋七月壬子命御史大
夫伯忽脫歡答刺罕整治臺綱仍詔諭中外乙卯封月
魯帖木兒爲保恩王丙寅燕帖木兒知樞密院事八月

癸酉兵部尙書乞塔爲中書參知政事己卯車駕至白上都九月辛丑中書左丞郭貫罷爲集賢大學士集賢大學士王毅爲中書左丞冬十月辛未江南行台侍御史高昉爲中書參知政事壬申有事於太廟是月周王和世琫至延安陝西行省左丞相阿思罕平章政事塔察兒行台御史大夫禿魯卜御史中丞脫歡與周王常侍教化等奉和世琫舉兵反十一月壬寅命監察御史監治嶺北行省乙巳改澧州路安撫司爲安定軍民府十二月庚午知樞密院事禿忽魯爲陝西行省左丞相丁亥立皇子碩德八剌爲皇太子兼中書令樞密使以

同知樞密院事床兀兒知樞密院事

四年春正月戊申詔曰朕仰惟太祖皇帝聖訓若曰應天順人惟以至誠保安天下宜遵正道重念列聖繼承丕祚我世祖皇帝混一之初顧予菲德懼勿克荷不遑甯處比者和世琫年幼聽信憮人阿思罕等謀爲不軌搆亂我家已爲陝西行省行台管軍官等將叛賊阿思罕教化徹里哥思等斬首以徇其同謀及脅從者欲一概加誅有所不忍宜推曠蕩之恩開以自新之路可大赦天下凡常赦所不原者罪無輕重咸赦除之若有避罪逃從逆黨竄匿者赦書到日限百日內出首與免本

罪限外不首復罪如舊敢以赦前事告許者以其罪罪之乙卯以襄甯王按灰代遼王脫脫鎮雲南丙辰知樞密院事完者爲雲南行省平章政事閏月壬申流魏王阿木哥於耽羅尋移大青島庚辰晉封鎮遠王孛羅爲冀王丙戌詔曰朕荷上天之鴻禧纂列聖之不緒比承皇太后慈訓若稽世祖皇帝成憲深惟國本宜建儲嗣親王大臣詢謀僉同皇子碩德八剌地居嫡長天錫仁孝可以主重器奉宗祧已於延祐三年十二月十九日授以金寶立爲皇太子中書令樞密使一如舊制因前盛典庸布新條一勉勵學校以作人才一勸課農桑耕

作以時一免探馬赤軍人合納糧稅一經行屯戍軍馬
勿騷擾百姓一免各路差稅有差一停罷內外不急之
役一免徵應合追賠係官錢糧一存恤鰥寡孤獨一岳
瀆帝王忠臣烈士除常祀外長吏擇日致祭於戲萬國
以貞允屬元良之重四方其訓永建太平之基咨爾臣
民體予至意辛卯封別帖木兒爲汾陽王二月甲辰勅
州縣復置社倉三月辛卯車駕幸上都甲午高麗國遣
使來獻方物夏四月壬寅加大常禮儀院使拜住大司
徒戊申答合孫寇邊吳王禿烈納等敗其衆於和懷已
未翰林學士承旨忽都魯兒迷失劉賡等譯大學衍義

以進敕翰林學士阿憐帖木兒以國語譯之五月辛未授上都留守闊闊出開府儀同三司大司徒乙亥封鄆國大長公主忙哥台爲皇姑大長公主壬午翰林學士承旨赤因帖木兒爲中書平章政事平章政事兀伯都刺罷爲集賢大學士己丑中書左丞阿里海涯爲中書平章政事參知政事乞塔爲中書右丞高昉爲中書左丞參議換住張思明並爲參知政事六月戊申鐵木迭兒罷左丞相阿散爲中書右丞相己酉兀伯都刺復爲中書平章政事壬子中書參知政事張思明罷爲工部尙書工部尙書王桂爲中書參知政事丁巳安南國來

貢方物秋七月乙亥中書平章政事李孟罷爲翰林學士承旨江浙行省左丞王毅爲中書平章政事壬午特授中衛親軍都指揮使孛蘭奚爲太尉己丑成紀山崩壓死居民八月丙申車駕至自上都九月丙寅宣徽使伯答沙爲中書右丞相阿散改左丞相故事右丞相必用蒙古勛臣阿散回回人遂固辭帝允之冬十月甲午朔有事於太廟壬寅遣御史大夫伯忽參知政事王桂祭陝西嶽鎮並賑成紀縣災民十一月己卯浚揚州運河辛卯以高麗國王王燾爲開府儀同三司駙馬高麗國王十二月乙己置詹事院以郭貫爲太子詹事丁己

禿滿迭兒知樞密院事特授晉王府長吏按攤出金紫
光祿大夫封魯國公

五年春正月丙子安南國來貢方物丁亥會試進士於
禮部加湖廣行省平章政事買住大司農魯國公二月
癸巳朔日有食之丁酉封諸王晃火帖木兒爲嘉王禿
滿帖木兒爲武平王三月戊辰廷試進士賜忽都達兒
霍希賢等五十人及第出身有差乙亥特授安遠王駙
馬醜漢開府儀同三司錄軍國重事知樞密院事加晉
王府內史拾得閭榮祿大夫封桓國公夏四月壬辰安
吉王乞台普濟卒己亥耽羅獵戶成金等作亂敕高麗

國王討之庚戌侍御史敬儼爲中書參知政事戊午車
駕幸上都五月辛酉朔八番順元蠻酋來獻方物丁卯
御史中丞亦列赤爲中書右丞己卯隴西縣山崩壓死
居民六月乙巳妖人趙子玉等謀往高麗迎魏王阿木
哥爲亂事覺伏誅秋七月己未朔加宦者李邦甯開府
儀同三司辛酉遣吏部尙書卜顏必閣赤買閭使高麗
責問魏王阿木哥及耽羅叛狀壬申諸王也舍失刺吉
等坐附叛王不里牙敦持兩端流也舍於江西失刺吉
於湖廣壬午罷河南行省左丞陳英等所括民田八月
庚子車駕至自上都九月癸亥大司農買住進司農丞

苗好謙所撰栽桑圖說命印千本散之民間丙寅廣西蠻酋黃法扶何凱等來獻方物丁卯中書右丞亦列赤爲平章政事左丞高昉爲右丞參知政事換住爲左丞吏部尙書燕只干爲參知政事丙戌僉太常禮儀院事狗兒爲中書參知政事丁亥立行宣政院於杭州冬十月己丑播州南甯蠻酋洛麼叛勅恩州守臣換住哥招諭之洛麼來獻方物甲午有事於太廟十一月己巳以同知樞密院事忠嘉知樞密院事十二月壬辰特授集賢大學士脫列大司徒

六年春正月丁巳朔暹國來貢方物癸酉特授同知徽

政院事醜驢答刺罕金紫光大夫太尉己卯廣東搖賊
趙郎庚等作亂敕江西行省討之是月前中書右丞尙
文爲太子詹事二月丁亥朔日有食之丁酉雲南閣里
愛俄永昌蒲蠻阿八刺等並叛敕雲南行省討之三月
丁巳以天壽節釋重囚一人辛酉召見太子詹事尙文
於嘉禧殿之後閣帝謂太保曲出口是世祖皇帝效力
人也又詔文曰託汝善輔太子有言勿吝此朕意也丙
寅特授翰林學士承旨八兒思不花開府儀同三司大
司徒己巳晉封保恩王月魯帖木兒爲恩王夏四月庚
子車駕幸上都鐵木迭兒爲太子太師五月丙子加安

南國王陳益稷開府儀同三司是月雲南行省左丞朶兒只討永昌南窩蒲蠻大敗之其酋阿良等降六月癸丑以羽林軍萬人隸東宮秋七月丙辰緬國來貢方物來安路總管岑世興叛賜璽書招諭之壬戌以者連怯耶兒萬戶府隸東宮置右率衛府甲戌皇姊魯國大長公主作佛事擅釋全甯路重囚二十七人敕按問全甯官吏阿縱不法仍追囚還獄八月甲申河東山西道宣慰使張思明爲中書參知政事庚子車駕至自上都閏八月壬申太傅御史大夫伯忽爲太師九月甲申徽政使朶帶爲太傅中書參議欽察爲中書參知政事癸卯

詔四宿衛以貪污受刑奪職不敘者勿令入禁庭冬十月乙卯詔嚴鞠白雲宗道士沈明仁姦惡戊午遣中書右丞相伯答沙授皇太子玉册辛酉札魯忽赤鐵木兒不花爲御史大夫十一月丙子詔曰朕惟世祖皇帝憲章隆古垂裕萬世灼然垂訓豫建嫡嗣是以協謀僉同立皇子碩德八剌爲皇太子若稽册命屬當舉行於今十月七日授以玉册大慶禮成於戲天地之德宗社之靈國本旣崇人心攸繫咨爾有衆體予至懷十一月辛卯木邦路蠻酋帶邦作亂敕雲南行省招撫之乙巳秘書卿苦思丁爲大司徒十二月壬戌命皇太子參決國

事封宋儒周敦頤爲道國公壬申中書平章政事王毅以親老致仕許之仍賜其父幣帛

七年春正月辛巳朔司天監奏是日日食帝齋居損膳輟朝賀旣而不食癸未帝御大明殿受諸王百官賀丁亥帝不豫辛丑崩於光天宮年三十有五在位九年癸卯葬起輦谷三月乙未上尊諡曰聖文欽孝皇帝廟號仁宗國語曰普顏篤皇帝

史臣曰仁宗孝慈恭儉不邇聲色不殖貨利待宗戚勛舊始終以禮大臣親老時加恩賚有司奏大辟輒惻怛移時晉甯侯甲兄弟五人俱坐法死帝憫之宥一人以

養其父母崇尙儒學興科舉之法得士爲多可謂元之
令主矣然受制母后嬖倖之臣顛權用事雖稔知其惡
猶曲貸之常問右丞相阿散曰卿日行何事對曰臣等
奉行詔旨而已帝曰祖宗遺訓朝廷大法卿輩猶不遵
守况朕之詔旨乎其切責宰相如此有君而無臣惜哉

新元史卷之十七終

親ヲ身ノ一ノヲ系

一三

本紀第十八

新元史卷之十八

賜進士出身日講起居注官翰林院侍讀國史館纂修膠州柯劭忞撰

英宗

英宗睿聖文孝皇帝諱碩德八剌仁宗長子也母曰莊懿慈聖皇后宏吉刺氏以大德七年二月甲子生仁宗延祐三年議立皇太子興聖太后屬意於帝帝入見太后固辭曰臣幼宜立臣兄和世琿太后不從冬十二月丁亥立爲皇太子授金寶六年冬十月戊午受玉册詔百司庶務先啓皇太子然後奏聞七年春正月仁宗不豫帝憂形於色焚香告天乞以身代辛丑仁宗崩哀毀

逾禮日歿一粥甲辰皇太后復以鐵木迭兒爲中書右丞相丙午遣使讞內外訟獄二月壬子浙江行省左丞政事赤斤帖木兒御史大夫脫歡並罷爲集賢大學士甲子逮四川行省平章政事趙世延至京師丙寅陝西行省平章政事趙世榮爲中書平章政事江西行省右丞木八剌爲中書右丞參知政事張思明爲左丞中書左丞換住出爲嶺北行省右丞己巳罷上都乾元寺規運總管府辛未括諸路係官山場河泊窰冶廬舍壬申召陝西行台御史大夫答失鐵木兒至京師丁丑奪翰

林學士承旨李孟韓國公勅命戊寅中書平章政事兀伯都刺出爲甘肅行省平章政事阿禮海涯出爲湖廣行省平章政事鐵木迭兒以皇太后命殺集賢大學士楊朶兒只崇禋院使蕭拜住並籍其家三月壬午爪哇國來貢方物戊子詔諸王駙馬流竄者還就分邑庚寅帝卽位於大明殿詔曰洪惟太祖應期撫運肇開帝業世祖皇帝神機睿略統一海內以聖繼聖迨我先皇帝至仁厚德涵濡羣生君臨萬國十年於茲以社稷之遠圖定天下之大本協謀宗親授子冊寶方春官之與政遽昭考之賓天諸王近戚元勛碩輔咸謂朕宜體先皇

帝付託之重既深系乎人心詎可虛於神器合辭勸進誠意交孚乃於三月十一日卽皇帝位於大明殿可大赦天下腹裏被災路分據延祐七年合該絲線十分爲率擬免五分其餘諸路絲線並江淮夏稅均免三分之一延祐七年以前逋欠差徭稅銀並行蠲免已徵入主典之手不在蠲免之限各處站赤消乏毋泛濫給驛差役不均監察御史廉訪司嚴行糾治遠近諸軍其陣亡者常例存恤外更展限一年本管官及奧魯官毋非理科徵兩廣福建等處嘯聚賊徒詔書到日限六日內出官自首許免本罪限外不悛依常收捕務農所以厚民

勸學所以興化各處提調官加意勉求實效岳瀆帝王
諸在祀典者長吏擇日致祭是日尊皇太后爲太皇太
后詔曰朕惟爲治之端無加於立孝根本之內莫大於
尊親朕肇纘丕圖恪遵彝典欽惟儀天興聖慈仁昭懿
壽元全德泰甯福慶皇太后仁明淵靜淑睿懿恭定大
策於兩朝功施社稷著徽音於四海慶衍本支夙荷恩
慈撫予眇質思仰酬於厚德宜首進於隆名謹上尊稱
曰太皇太后其應行典禮令有司討論以聞壬辰太皇
太后受百官朝賀於興聖宮鐵木迭兒進開府儀同三
司上柱國太師丙申斡羅思等來降賜鈔萬四千貫還

其部戊戌勅陰陽醫官匠人勿承蔭辛丑禁擅奏璽書
以樞密院兼領左右衛率府壬寅翰林學士承旨李孟
降爲集賢侍講學士御史台請詔諭百司以肅台綱帝
曰卿等但守職盡言善則朕從之否亦不汝罪也甲辰
詔中外毋沮議鐵木迭兒丙午有事於南郊告卽位夏
四月庚戌有事於太廟告卽位詔羣臣曰一歲惟四祀
使人代之不能致如在之誠朕必終身親蒞祀事諭卿
等知之廷臣言祀事畢宜赦天下帝曰赦不可屢下使
殺人者獲免則死者何辜命中書省陳便宜事行之河
南湖廣遼陽三行省丞相並降爲平章政事惟征東行

省以高麗王不降乙卯封諸王徹徹禿爲甯遠王戊午
祀社稷告卽位己未紹慶路洞蠻叛平章政事王毅中
書右丞高昉徵理京師諸倉庫糧帛虧額庚申太常禮
儀院使拜住爲中書平章政事戊辰車駕幸上都封高
麗王從子王煦爲雞林郡公有因近侍獻七寶帶者帝
曰朕卽位不聞卿等薦賢而爲人進寶是以利誘朕也
其還之照刷宣徽院文卷五月庚辰殺上都留守賀伯
顏籍其家己丑中書左丞相阿散出爲嶺北行省平章
政事中書平章政事拜住爲中書左丞相乃剌忽塔失
海牙並爲中書平章政事只兒哈郎爲中書參知政事

辛卯中書參知政事欽察罷爲集賢大學士乙未請大
行皇帝謚於南郊戊戌嶺北行省平章政事阿散中書
平章政事黑驢御史大夫脫忒哈徽政院使失列門等
與黑驢母亦列失八謀廢立事覺俱伏誅辛丑知樞密
院事鐵木兒脫爲中書平章政事甲辰詔曰朕肇登大
寶祇遙先猷仍圖任於舊人庶共新於治效豈期邪黨
輒蘊私心邇者阿散黑驢脫忒哈失列門亦列失八等
潛結詭謀撓亂國政旣自作於不靖固難追於嚴誅賀
伯顏輕侮詔書殊乖臣禮不加懲創曷示等威今已各
正典刑籍沒其家於戲惟邦國之用刑以靖羣慝俾人

臣之知戒勿蹈非彝咨爾有衆體予至懷丁未封諸王
王禪爲雲南王六月己酉流徽政院使米薛迷干於金
剛山甲寅前太子詹事床兀兒坐黨附阿散等伏誅丙
辰召河南行省平章政事楚仙帖木兒至京師收脫忒
哈廣平王印丁巳江西行省左丞相脫脫爲御史大夫
宗正札魯火赤鐵木兒不花爲知樞密院事戊午罷詹
事院封知樞密院事塔失帖木兒爲薊國公乙丑西番
酋盜洛各目降己巳高麗國遣使賀卽位是月奉元蓋
屋縣妖僧圓明作亂僞稱皇帝秋七月甲申知樞密院
事買驢哈丹並出爲遼陽行省平章政事乙未甘肅行

省平章政事欽察知樞密院事丙申中書平章政事乃
刺忽罷安王兀都思不花降封順陽王尋賜死始製袞
冕庚子江南行台御史中丞廉恂爲中書平章政事乙
已知樞密院事也先吉尼出爲江西行省平章政事是
月雲南花角蠻酋韋郎達叛八月戊申祭社稷丙辰附
仁宗聖文欽孝皇帝莊懿慈聖皇后於太廟九月壬辰
土番酋利族阿俄等寇成谷循州蠻酋泰元吉叛庚子
慈利州山民貞公糾合諸洞蠻酋並叛遣湖廣行省討
之甲辰雲南木邦路蠻酋給邦遣其子來獻方物賜幣
有差馬札蠻等使占城占臘龍牙門諸國索馴象是月

奉元路達魯花赤伯顏獲僧圓明誅之永甯路蠻酋和
俄等叛渠州吏目李榮貴死之冬十月丁未有事於太
廟丁巳酉陽州聳儂洞蠻叛遣四川行省討之戊午車
駕至自上都詔太常院曰朕將以四時躬禮太室宜與
羣臣集議其禮此追遠報本之道毋以朕勞於對越而
有所損安南國遣使貢方物酉陽州蠻酋冉世昌遣其
子率大小石隄洞蠻人貢癸酉流諸王阿剌鐵木兒於
雲南十一月丙子朔帝御齋宮丁丑有事於太廟至仁
宗皇帝室嗚咽流涕左右感動辛巳以享太廟禮成御
大明殿受賀甲申修仁宗實錄戊戌交趾蠻儂志德掠

脫零那乞等六洞十二月乙巳朔詔曰朕祇遙詒謀獲承丕緒念付託之惟重顧繼述之敢忘爰以延祐七年十一月丙子被服袞冕恭謝太廟既大禮之告成宜普天之均慶屬茲踰歲用易紀元於以導天地之至和法春秋之謹始可以明年爲至治元年普免天下至治元年地丁糧十分之二合該包銀除兩廣海北海南權且停攔其餘減免三分之一大都上都興和三路免差稅三年腹裏被災人民與免絲料三分燕南山東汴梁歸德汝甯災傷地面應有山場河泊並聽民開采諸人侵盜失限短少減駁合追係官錢糧如在詔書以前已有

追理文案者先將奴婢財產准折入官不敷之數並行
釋免已徵入主典之手不在此例回回人等典賣蒙古
子女爲驅者分付所在官司應付口糧收養聽候中書
省定奪流移戶口如欲復業者官司給付行糧拖欠差
徭課程並行倚閣原拋田產全行給付仍免差稅三年
諸翼軍人消乏衆樞密院分揀合併存恤管軍官放錢
利息及翻倒文契者詔書到日盡行停攔和林甘肅雲
南四川福建廣海新附漢軍除常例外每名給布一疋
死者給燒埋銀站赤消乏諸衙門及諸王公主駙馬差
使常加撙節一切關防約束事理悉從舊制若有不應

差人及多餘鋪馬者嚴行斷罪煎鹽冶鐵運糧船戶合該雜泛差役優免三年腹裏權住煽辦以紓民力經過軍馬昔寶赤八兒赤等不得需索百姓縱駝馬損壞田禾樹木雲南四川福建廣海之任官員不幸病故所在官司取勘應付車船鋪馬仍給行糧如有典賣人口並聽完聚價不追還商稅三十分取一已有定制今正額之外又索羨餘非多取於民彼將焉出仰將延祐七年實辦到官數目爲定額已後永不多取和雇和買一切雜稅差役除邊遠軍人及自備首思站赤外不論何戶與民一體均當諸內外七品官以上有偉畫長策可以

濟世安民者實封呈覽監察御史布政廉訪司歲舉可
任守令者二人隱居行義不求聞達者有司具狀以聞
復封贈之制中書省集議舉行戊申流前高麗王諫於
吐番撒思結之地丁未播州蛋蠻的羊龍等來降乙卯
上太皇太后徽號曰儀天興聖慈仁昭懿壽元全德泰
甯福慶徽文崇裕太皇太后翰林學士忽都魯都兒譯
進宋儒真德秀大學衍義帝曰修身治國無踰此書賜
鈔五十萬貫丙辰以太皇太后加號御大明殿受賀丙
寅典瑞院使闕徹伯知樞密院事戊辰告祀太廟己巳
中書右丞木八刺出爲江西行省右丞中書參知政事

只兒哈郎爲中書右丞江南浙西道廉訪使薛處敬爲中書參知政事上思州獠寇忠州江浙行省平章政事伯顏索兒江西行省平章政事白撒都並坐貪墨免官至治元年春正月乙酉高麗國遣使獻童女丙戌有事於太廟左丞相拜住爲亞獻知樞密院事闊列伯爲終獻是月詔高麗王燾入朝二月戊申祭社稷改中都武衛爲忠翊衛親軍都指揮使司己酉建仁宗神御殿於普慶寺丁巳畋於柳林殺監察御史觀音保鎖咬兒哈的迷失杖流監察御史成珪李謙亨於奴兒干三月丁丑緬國遣使貢方物庚辰廷試進士泰普化宋本等六

十四人賜及第出身有差辛巳車駕幸上都辛丑鐵失
爲御史大夫夏四月庚戌有事於太廟己未吉陽黎寇
甯遠縣戊辰宦者李羅台爲太常署令太常卿言刑人
不應與祭罷之五月壬午遷武宗皇子圖帖木兒於瓊
州辛丑太常禮儀院進太廟制圖六月癸卯朔日有食
之丁巳前中書參知政事敬儼爲陝西行台御史中丞
辛酉趙宏祚等言事勅勒歸田里仍禁妄言時政乙丑
遣使銓江浙江西湖廣四川雲南五省官選己巳上都
留守只兒哈郎爲中書平章政事秋七月丁丑有事於
太廟癸未封太尉孛蘭奚爲和國公乙酉渾河決被災

者二萬三千三百戶吏部尙書教化禮部郎中文矩頌
卽位詔於安南國八月戊申祭社稷庚戌知樞密院事
鐵木兒不花整治軍人貧乏勅有敢擾害者罪之乙卯
中書平章政事鐵木兒脫罷爲上都留守壬戌帝駐蹕
興和左右以寒甚請還大都帝曰兵以牛馬爲重民以
稼穡爲本朕遲留蓋欲馬得芻秣民獲刈穫耳豈畏寒
乎雷州路海康遂溪二縣海溢秦州成紀山崩九月丙
子車駕駐昂兀嶺壬辰中書平章政事塔失海牙坐受
賕杖免丁酉帝至自上都冬十月庚戌有事於太廟左
丞相拜住爲亞獻御史大夫鐵失爲終獻癸丑敕翰林

集賢官年七十毋致仕丙寅河南行省參知政事你咱
馬丁坐殘賊免官十一月戊寅羣臣上尊號曰繼天體
道敬文仁武大昭孝皇帝己卯以受尊號詔天下左丞
相拜住請釋罪囚不允辛巳鐵失領左右阿速衛十二
月辛巳立亦啓烈氏爲皇后癸卯以立皇后詔天下戊
申告謝太廟己酉封峻南臧卜爲白蘭王庚戌建太廟
正殿

二年春正月辛亥朔安南國占城國各遣使來貢方物
丁巳有事於太廟賜導駕耆老幣帛戊寅敕有司存恤
孔氏子孫貧乏者癸未流徽政使羅源於耽羅封塔齊

兒爲蘭國公二月庚子立左右欽察衛親軍都指揮司
拜住兼都指揮使癸卯江南行台御史大夫欽察爲中
書平章政事江浙行省參知政事王居仁爲中書參知
政事薛處敬出爲河南行省左丞戊申祭社稷丁卯遼
陽行省平章政事買驢爲中書平章政事三月己巳朔
御史台翰林院國子監同議興舉學校壬申張珪復大
司徒癸酉罷京師營役卒四萬餘人辛巳翰林待制沙
的使高麗訊高麗王燾不奉勅書事丙戌以享太廟禮
成普減內外官一資丁亥鳳翔道士王道明坐妖言伏
誅丁酉車駕幸柳林駙馬許訥子速怯坐訐其父母伏

誅夏四月戊戌朔車駕幸上都五月己巳封公主速克
八拉爲趙國大長公主庚午奉符縣民王驢兒等謀反
伏誅癸未御史大夫脫脫爲江南行台御史大夫立宗
仁蒙古侍衛親軍都指揮使司車駕幸五台山甲申只
兒哈朗爲御史大夫雲南行省平章政事答失鐵木兒
朶兒只等坐受賕杖免閏月癸卯諸王阿馬承童擅役
諸王脫列捏衛士並杖流海南戊申鐵木迭兒子班丹
爲知樞密院事丙寅沅州洞蠻叛禁諸司隔越中書省
奏事六月丁卯車駕幸五台山禁扈從者毋踐民禾壬
午辰州江水溢秋七月壬子諸王閣閣禿總兵北邊戊

午車駕次應州曲赦金城縣囚辛酉車駕次渾源州中
書右丞張思明有罪杖免籍其家八月戊辰祭社稷已
巳道州甯遠縣民符翼軫謀反伏誅甲戌車駕次奉聖
州庚寅鐵木迭兒卒九月辛亥車駕幸壽安山寺丙辰
太皇太后崩庚申停今年冬祀南郊冬十月戊辰有事
於太廟以國哀迎香去樂丙子押濟思國來貢方物杖
謫江南行台御史大夫脫脫於雲南甲申建太祖神御
殿於興教寺己丑拜住爲中書右丞相十一月甲午朔
日有食之己亥以授右丞相詔天下流民復業者免差
稅三年站戶鬻妻子者官贖還之凡差役先科商賈及

富實之家以優農力差免陝西稅十之三各路官田租
十之二江淮剋科包銀全免之安南國來貢方物癸卯
京師地震十二月甲子朔建昌州山崩丁卯中書平章
政事買驢罷爲大司農廉恂罷爲集賢大學士集賢大
學士張珪爲中書平章政事甲戌來安路總官廣西猺
岑世興叛宣政院使八思吉思坐受劉夔冒獻田地下
獄帝謂左右曰祖宗制法非朕所得私八思吉思雖事
朕日久今有罪朕不敢枉縱也論如律庚辰葛蠻安撫
司副使龍仁貴叛知樞密院事欽察台罷爲宣政院使
中書參知政事速速爲中書左丞宗仁衛親軍都指揮

使馬刺爲中書參知政事癸未紹興路洞蠻把者叛御史大夫只兒哈郎爲知樞密院事封諸王徹徹禿爲武甯王以地震日食命中書省樞密院御史台翰林集賢院會議國家利害之事以聞

三年春正月癸巳暹國遣使來貢方物八番蠻酋韋思正等降請納歲租乙未有事於太廟己亥思明州盜起壬寅行中書省復兼總軍政前樞密院使吳元珪王約爲集賢大學士翰林侍講學士韓從益爲昭文館大學士並商議中書省事辛亥命鐵失振舉台綱靜江路邕柳諸州獠叛丙辰泉州民留應總作亂二月丙寅翰林

國史館進仁宗實錄遣教化撫西番降族戊辰祭社稷
賓丹爪哇等國來貢方物癸酉畋於柳林辛巳司徒劉
夔同僉樞密院事囊家歹有罪伏誅頒行大元通制戊
子封鷹師不花爲趙國公辛卯諸王月思別遣使來朝
三月壬辰朔車駕幸上都丁未西番參卜郎叛鎮西武
靖王搠思班以兵討之戊申附太皇太后於順宗廟室
右丞相拜住攝太尉奉冊寶上尊諡曰昭獻元聖皇后
夏四月己巳釋大辟囚三十一人杖五十七以上六十
九人已卯行助役法丁亥前羅羅斯宣慰使述古妻漂
末遣其子來獻方物五月庚子大風雨雹鐵失獨署御

史大夫事壬寅雲南行省平章政事忽辛坐受賕杖免
戊申追奪鐵木迭兒官爵帝御大安閣見太祖世祖遺
衣皆以縑素木棉爲之重加補綴嗟歎良久謂左右曰
祖宗創業艱難服用節儉如此朕安敢頃刻忘之戊午
奉天行宮正殿災六月丁卯徽政使醜驢討參卜郎癸
未贈乳母禿忽台定襄郡夫人其夫阿來追封定襄王
癸酉增太廟夾室乙酉叛王怯伯來降秋七月壬辰占
城國王遣其弟保佑八刺遮來貢方物癸卯太廟成乙
巳招諭左右兩江叛酋黃聖許岑世興已酉封諸王拔
都帖木兒爲威遠王丙辰籍鐵木迭兒家御史合請下

詔開言路帝曰言路何嘗不開卿等選人未當爾八月
癸亥車駕南還是夕駐蹕南坡御史大夫鐵失知樞密
院事也先帖木兒大司農失禿兒前平章政事赤斤帖
木兒前雲南行省平章政事完者鐵木迭兒子前治書
侍御史鎖南鐵失弟宣徽使鎖南典瑞院使脫火赤樞
密院副使阿散僉書樞密院事章台衛士禿滿及諸王
按梯不花孛羅月魯鐵木兒曲律不花兀魯思不花等
同謀弒逆以鐵失所領阿速衛兵爲外應鐵失赤斤帖
木兒先殺中書右丞相拜住遂弒帝於行殿在位三年
年二十有一泰定元年二月上尊諡曰睿聖文孝皇帝

廟號英宗四月上國語廟號曰格堅皇帝

史臣曰英宗誅興聖太后倖臣失列門等太后坐視而不能救其嚴明過仁宗遠甚然蔽於鐵木迭兒既死始悟其奸又置其逆黨於肘腋之地故南坡之禍由於帝之失刑非由於殺戮也舊史所譏殆不然矣

新元史卷之十八終

本紀第十九

新元史卷之十九

賜進士出身日講起居注官翰林院侍讀國史館纂修膠州柯劭忞撰

泰定帝

泰定皇帝諱也孫鐵木兒裕宗之孫顯宗甘麻刺長子也母曰宣懿淑聖皇后宏吉刺氏世祖封顯宗爲晉王出鎮北邊統領太祖四大斡耳朵至元十三年十月二十九日生帝於北邊成宗大德六年顯宗卒帝襲封晉王仍鎮北邊武宗至大三年九月奏世祖以張鐵木兒所獻惠州金銀銅冶賜臣後輸於有司乞回賜武宗許之仁宗皇慶元年二月賜南康路六萬五千戶爲食邑

延祐元年四月復諭帝以惠州金銀銅冶歸有司七月仍回賜於帝壬午命帝賑遼東飢民英宗卽位部衆飢賜鈔五千萬帝以田七千頃入官請徵其年租以償賜鈔其謹事朝廷如此至治三年八月辛酉獵於禿刺河御史大夫鐵失遣其黨斡羅思以逆謀來告曰我與哈散也先鐵木兒失禿兒謀已定事成立王爲皇帝又命斡羅思以其事告內史倒刺沙且言勿令旭邁傑知之於是帝命囚斡羅思遣別列迷失等赴上都告變未至英宗駐蹕南坡鐵失等弒英宗於行殿諸王按梯不花及也先鐵木兒等奉璽綬來迎時中書平章政事張瑄

在京師聞變告留守魏王徹徹禿大統宜在晉王徹徹禿遣使至行在勸進九月癸巳帝卽位於龍居河大赦天下知樞密院事淇陽王也先鐵木兒爲中書右丞相諸王月魯鐵木兒襲封安西王召前高麗王璋還京師甲午倒刺沙爲中書平章政事乃馬合爲中書右丞鐵失馬思忽門並知樞密院事孛羅爲宣徽院使旭邁傑爲宣政院使乙未樞密院使哈散爲御史大夫內史善僧爲中書左丞丁酉完澤知樞密院事禿滿同僉樞密院事戊戌撒的迷失知樞密院事章台同知樞密院事辛丑馬謀沙知樞密院事失禿兒爲大司農冬十月甲

子遣使至大都以卽位告天地宗廟社稷諸王買奴進
日不討逆賊則陛下善名不著天下後世何從而知非
與聞其故乎帝然之也先鐵木兒完澤鎖南禿滿等並
伏誅於行在旭邁傑爲中書右丞相陝西行省左丞相
禿忽魯通政院使紐澤並爲御史大夫中書左丞速速
爲御史中丞旭邁傑紐澤至上都鐵失失禿兒赤斤鐵
木兒脫火赤章合等並伏誅戊辰召高昌王鐵木兒補
花至行在移魏王阿木哥於大同壬申內史按答出爲
太師知樞密院事癸未江浙行省平章政事兀伯都刺
爲中書平章政事八番順元洞蠻及靜江大理諸路猺

並叛甲戌直省舍人阿魯沙等頒卽位詔於高麗十一月已丑朔車駕次於中都辛丑車駕至京師丁未御大明殿受諸王百官朝賀辛亥御史中丞董守庸有罪免官癸丑遣使至曲阜以太牢祀孔子丙辰御史中丞速速有罪免官丁巳廣東新會縣民汜長弟作亂副元帥烏馬兒討平之十二月己未雪楊朵兒只蕭拜住賀伯顏觀音保鎖咬兒哈的迷失及李謙亨成珪王毅高昉張志弼普顏篤卜顏忽里等寃存者召用死者贈卹有差戊辰請皇考妣尊諡於南郊上皇考晉王尊諡曰光聖仁孝皇帝廟號顯宗皇妣宏吉刺氏尊諡曰宣懿淑

聖皇后已巳盜竊太廟仁宗金主莊懿慈聖皇后金主
甲戌鐵木迭兒子鎖南及其黨月魯禿禿哈速敦並伏
誅癸未廣西來安路總管岑世興來獻方物流月魯帖
木兒於雲南按梯不花於海南曲呂不花於奴兒干孛
羅及兀魯思不花於高麗大青島乙酉雲南車里蠻入
寇丙戌封諸王買奴爲泰甯王知樞密院事闊徹伯授
開府儀同三司前太師拜忽商議軍國重事丁亥改元
泰定詔曰朕荷天鴻禧嗣大厯服側躬圖治夙夜祇畏
惟祖訓是遵乃明歲甲子景運伊始思與天下更始稽
諸典禮踰年改元可改明年爲泰定元年免大都興和

差稅三年八番思播兩廣洞寨差稅一年江淮捌科包
銀三年四川雲南甘肅秋糧三分河南陝西遼陽絲鈔
三分除虛增田稅免幹脫逋錢賑恤雲南廣海八番等
處戍軍求直言賜高年帛禁獻山場湖泊之利定吏員
出身者許至四品是月雲南花角蠻入寇平章政事倒
刺沙爲中書左丞相知樞密院事馬謀沙御史大夫紐
澤宣政院使欽禿並加光祿大夫

泰定元年春正月中書右丞乃馬台爲平章政事中書
左丞善僧爲右丞召江西行省平章政事也兒吉的至
京師己亥以誅逆賊也先鐵木兒等詔天下壬寅拜住

子答兒麻失里爲宗仁衛親軍都指揮使撒里哈爲左
右衛阿速親軍都指揮使丁未嶺北行省參知政事帖
陳禮部尙書忽都帖木兒使於諸王不賽因戊申八番
生蠻韋光正等來降歲輸布二千五百匹己酉召懷甯
王圖帖木兒於瓊州魏王阿木哥於大同甲寅敕高麗
王燾歸國還其王印二月壬申請大行皇帝尊諡於南
郊上尊諡曰睿聖文孝皇帝廟號英宗甲戌中書平章
政事張珪翰林學士承旨忽都魯都兒迷失翰林侍講
學士吳澄集賢直學士鄧文原進講帝範資治通鑑大
學衍義貞觀政要以右丞相旭邁傑領之諸王怯別孛

羅各遣使貢方物高昌王帖木兒補化遣使獻蒲陶酒
三月丁亥立詹事院太傅朵斛宣徽使禿滿迭兒桓國
公拾得閩太尉丑閩答刺罕並爲太子詹事中書參知
政事王居仁罷爲副詹事同知宣政院事楊廷玉爲中
書參知政事乙未江西行省平章政事也兒吉的知樞
密院事戊戌廷試進士賜八刺張益等八十四人及第
出身有差會試下第者亦賜教官有差庚子中書平章
政事欽察出爲陝西御史大夫四川行省平章政事囊
家合兼宣政院使討西番參卜郎癸卯中書平章政事
乃馬合攝祭南郊知樞密院事闊列伯攝祭太廟告册

立皇后及皇太子丙午立宏吉刺氏爲皇后皇子阿速
吉八爲皇太子己酉皇子八的麻亦兒間卜嗣封晉王
湘甯王八刺失里出鎮察罕腦兒知樞密院事也兒吉
的出爲雲南行省右丞相癸丑廣西橫州猺寇永淳縣
諸王不賽因遣使貢方物夏四月癸亥上國語英宗廟
號曰格堅皇帝甲子車駕幸上都諸王寬徹不花失刺
平章政事兀伯都刺右丞善僧等居守嶺北行省左丞
潑皮爲中書左丞江南行台中丞朵朵爲中書參知政
事參知政事馬刺罷爲太史院使諸王不賽因遣使貢
方物丁卯封憲宗女孫買的爲昌國大長公主癸酉太

子詹事禿滿迭兒爲中書平章政事庚辰以災異戒飭百官辛巳太廟新殿成五月壬辰御史大夫禿忽魯紐澤以災異屢見不能劾宰相徇私違法自請罷黜於是中書平章政事兀伯都刺張珪參知政事楊廷玉中書右丞相旭邁傑左丞相倒刺沙先後皆引罪自劾帝慰留之戊戌奉移列聖神主於太廟新殿辛丑循州猺寇長樂縣六月乙卯朔諸王闊闊木出鎮畏兀兒部戊午雲南蠻酋高蘭等寇威楚州丙寅招諭西番參卜郎廣西叛蠻黃勝許岑世興乞遣其弟子朝貢許之己卯諸王怯別等遣使貢馴豹西馬詔疏決繫囚存恤軍士免

天下和買雜役三年蛋戶差稅一年內外官四品以下
率散官一等三品遞進一階仕瘴地身死者有司資給
歸葬仍著爲令秋七月丙戌思州蠻酋楊大車酉陽州
蠻酋冉世昌並叛庚子諸王伯顏帖木兒出鎮闊連東
部阿刺忒納失里出鎮沙州癸卯罷閩廣等處采珠蛋
戶爲民仍免差稅一年吏部尙書馬合謀等頒卽位詔
於安南定州屯河溢山崩廣西慶遠徭酋潘文絹等來
降八月丙辰有事於太廟丁丑車駕至自上都癸酉招
諭雲南大小車里蠻酋秦州成紀山崩水溢九月乙酉
封也速不堅爲荆王癸丑岑世興來獻方物冬十月戊

午有事於太廟庚申高麗國遣使賀聖誕己巳雲南車里蠻酋寒賽子尼而雁搆木子刁零降壬申安南世子陳日爨遣使貢方物丁丑雲南王王禪改封梁王其子帖木兒封雲南王封武宗皇子圖帖木兒爲懷王十一月癸巳諸王不賽因藩臣出班授開府儀同三司封翌國公己亥朮温合知樞密院事己酉免也里可温答失蠻差役十二月癸丑朔岑世興遙授沿邊溪洞軍民安撫使致仕其子志熟爲上思州知州仍各賜幣帛乙卯雲南徭阿吾等叛庚申同州地震癸亥鹽官州海溢丙寅修顯宗英宗實錄乙亥曲赦重囚三十八人容米洞

蠻田先什用等率九洞俱叛

二年春正月乙未敕后妃諸王駙馬毋接星術之士非
天文官不得妄言禍福戊戌參卜郎降辛丑懷王圖帖
木兒出鎮建康甲辰江浙行省平章政事脫歡答剌罕
爲行省右丞相諸王怯別遣使貢方物庚戌詔羣臣曰
向者卓兒罕察苦魯及山後皆地震內郡大小民飢朕
自卽位以來惟太祖開創之艱世祖混一之盛期與民
人共享安樂災沴之至莫測其由豈朕思慮有所不及
而事或僭差天故以此示警與卿等其與諸司集議便
民之事自死罪始議定以聞閏月壬子朔大赦天下除

江淮剋科包銀免被災地差稅一年戊辰諸王忽塔梯
迷失等來朝己卯階州土番入寇站八兒監藏叛於兀
敦頒族葬制禁陰陽相地邪說二月甲申祭先農丁亥
平伐苗酋的娘來降辛卯爪哇國遣使貢方物廣西猺
酋潘寶陷柳城縣己亥封阿里迷失爲和國公張珪爲
蔡國公中書右丞善僧爲平章政事中書左丞潑皮爲
右丞御史大夫禿忽魯加太保是月中書平章政事張
珪致仕三月甲寅禁捕天鵝乙丑車駕幸上都乙亥安
南世子陳日曠遣使貢方物夏四月辛丑壽甯公主加
封皇姊大長公主丁未封后父火里兀察兒爲威靖王

戊申山東廉訪使許師敬爲中書左丞中政使馮享爲
中書參知政事仍兼中政使五月壬子開南州阿都刺
蠻酋引車里酋陶刺孟等寇陷朵刺等十四寨木邦路
蠻酋八廟等寇陷倒八漢寨癸丑龍牙門國來貢方物
辛未通政院使察乃使於周王和世疎癸酉融州洞猺
叛丙子檀州大水平地深丈有五尺六月己卯朔皇子
小薛生靜江猺叛廣西宣慰司討之癸未潯州平南縣
猺叛達魯花赤都堅縣尹姚泰亨死之甲申嘉王晃火
帖木兒改封并王丙申勅御史合樞密院大臣勿領軍
衛丁酉靜江猺及慶遠猺並叛息州民趙丑厠郭普薩

坐妖言彌勒佛當有天下伏誅辛丑柳州徭叛秦州山
移秋七月戊申朔大小車里蠻來獻馴象甲寅遣使賚
璽書分諭徭蠻鎮康路蠻酋你囊謀粘路蠻酋賽邱羅
來降木邦路蠻酋八廟既降復叛丙辰有事於太廟播
州蠻酋黎平愛等叛癸亥廣西諸徭盡叛左丞乞住兵
部尙書李大成等討之以諸王幹耳朵罕監其軍海北
徭盤吉祥寇陽春縣庚午亦刺馬丹等至大理普顏實
立等至威楚招諭叛蠻思州洞蠻楊銀千等來獻方物
封駙馬孛羅帖木兒知樞密院事火沙並爲郡王辛未
置河南行都水監瀕河州縣並兼知河防事壬申敕太

傅朶觥太保禿忽魯日至禁中集議國事廣西猺潘寶
寇義甯來賓諸縣八月辛卯雲南白夷寇雲龍州九月
戊申朔分天下爲十八道遣使分道宣撫詔曰朕祇承
洪業夙夜維寅凡所以圖治者悉遵祖宗成憲曩屢詔
中外百司宣布德澤蠲賦詳刑賑恤貧民思與黎元共
享有生之樂尙慮有司未體朕意庶政或闕惠澤未洽
承宣者失於撫綏司憲者怠於糾參俾吾民重困朕甚
憫焉今遣使宣撫分行諸道按問官吏不法詢民疾苦
審理冤滯凡可以興利除害從宜舉行有罪者四品以
上停職申請五品以下就便處決其有政績尤異暨晦

迹邱園才堪輔治者具以名聞湖廣行省參知政事馬
合謀河東宣慰使李處恭之兩浙江東道鷹坊使朵列
禿太史院使齊履謙之江西福建道都功德使舉林伯
荆湖宣慰使蒙弼之江南湖廣道禮部尙書李家奴工
部尙書朱蕢之河南河北同知樞密院事阿吉刺御史
中丞曹立之燕南山東道太子詹事別帖木兒宣徽院
判韓讓之河東陝西道吏部尙書納哈出董訥之山北
遼東道陝西鹽運使衆家奴中書斷事官韓庭茂之雲
南湖南宣慰使寒食冀甯總管劉文之甘肅山東宣慰
使禿思帖木兒陝西行省左丞廉惇之四川翰林侍講

學士帖木兒不花秘書郎吳秉道之京畿道癸丑車駕
至自上都乙卯有事於太廟壬戌廣西徭寇賓州冬十
月戊寅朔岑世興寇上林州癸未中書左丞相倒刺沙
罷爲御史大夫丁亥有事於太廟癸巳播州凱黎苗叛
丁酉廣西徭酋何童降戊申周王和世刺遣使獻文豹
十一月庚戌以歲飢罷上都皇后營繕己未整飭台綱
庚申日本船來互市廣西宣慰使獲徭酋潘寶其弟潘
兒寇柳州行省左丞乞住討之丙寅倒刺沙復爲中書
左丞相加開府儀同三司錄軍國重事是月中書右丞
相旭邁傑卒十二月戊寅塔失帖木兒爲中書右丞相

癸未塔失帖木兒加開府儀同三司上柱國錄軍國重
事封薊國公甲午召張珪於保定丁酉加紐澤知樞密
院事與馬誅沙並開府儀同三司乞住等敗獯賊於廣
西元山路蠻酋普山叛

三年春正月丙午高麗國遣使貢方物並賀正旦播州
蠻酋黎平愛等來降戊申元江路蠻酋普奴叛諸王薛
徹禿晃火帖木兒來朝壬子封寬徹不花爲威順王鎮
湖廣泰甯王買奴改封宣靖王鎮益都諸王不賽因遣
使來獻馬翰林學士吳澄謝病歸癸亥知樞密院事撒
忒迷失出爲嶺北行省平章政事戊辰緬王荅里也伯

以國亂來乞師並獻方物安南國入寇陷思明州二月
壬午廣西全茗州猺酋許文傑叛茗盈州知州李德卿
等死之中書平章政事乃馬台知樞密院事甲戌爪哇
國來貢方物庚子通政院使察乃爲中書平章政事甲
辰車駕幸上都諸王也忒古不花平章政事兀伯都刺
察乃善僧左丞許師敬參知政事朵朵居守三月乙巳
朔帝以不雨自責命審錄重囚分禱岳瀆名山大川及
京師寺觀癸丑八番岩霞洞蠻來降丁巳諸王失刺出
鎮北邊戊午詔安撫緬國賜其王金幣丙寅翰林學士
承旨阿憐帖木兒許思敬等譯帝訓成賜名皇圖大訓

授皇太子讀之辛未泉州民阮鳳子作亂軍民官坐失
討降黜有差夏四月戊戌容米洞蠻寇長陽縣五月甲
戌朔諸王怯別遣使獻文豹乙巳罷福建歲貢蔗餉禁
西僧馳驛擾民甲寅八百媳婦酋招南道遣其子來獻
方物丁卯招諭岑世興庚午永明縣五洞猺河西加木
籠四部番夷俱來降六月癸酉朔四川行省平章政事
禿哈帖木兒請終母喪許之癸酉播州蠻酋黎平愛復
叛合蠻酋謝烏窮入寇招撫使楊燕里不花諭平愛出
降烏窮不從己亥納皇姊壽甯公主女撒答八刺爲皇
后道州猺叛秋七月甲辰車駕發上都禁車駝踐民田

禾丙午有事於太廟丁未紹慶蠻酋冉世昌叛辛亥封
阿都赤爲綏甯王乙卯翰林侍講學士阿魯威直學士
幹赤譯世祖聖訓以備經筵進講戊午諸王不賽因遣
使獻駝馬八百媳婦蠻來獻方物己巳鄭州陽武縣河
決八月甲戌平章政事兀伯都刺右丞許師敬以災異
饑饉乞罷黜不允乙亥知樞密院事乃馬台簡閱邊兵
甲申有事於太廟甯遠州洞蠻叛丁亥梁王王禪整飭
幹耳朶思邊事丁酉諸王不賽因遣使獻玉及獨峯駝
辛丑車駕次中都畋於汪兀察都之地鹽官州揚州崇
明州同時海溢九月庚申車駕至自上都癸亥賜大車

里新附蠻酋七十五人裘帽鞞鞞戊辰翰赤等使於諸
王怯別月思別不賽因威楚路蠻酋哀培等來獻方物
冬十月甲戌紐澤爲右御史大夫庚辰有事於太廟癸
未汴梁路河決十一月庚子朔諸王不賽因來獻虎癸
卯勅西僧以元日疏釋重囚當釋者命宗正府審覆辛
亥追復前中書平章政事李孟官戊午帖木兒不花襲
封鎮南王鎮揚州辛酉播州蠻宋王保來降丁丑諸王
月思別遺使獻文豹是月崇明州海盜十二月壬午御
史賈垕請耐武宗皇后於太廟不報庚寅大赦天下亳
州河決

四年春正月壬子靖安王闢不花出鎮陝西戊午鹽官
州海盜甲子武龍洞蠻寇武緣縣二月辛未祭先農乙
亥營王也先帖木兒出鎮北邊壬午畋於鄯州諸王火
沙阿榮達里俱出鎮北邊戊子衍聖公孔思晦進階嘉
議大夫馬忽思爲雲南行省平章政事提調烏蒙屯田
庚寅八百媳婦蠻來獻方物三月辛丑皇子允丹藏卜
出鎮北邊封那海赤爲惠國公商議內史府事丙午廷
試進士阿察赤李黼等八十五人賜及第出身有差辛
亥諸王搠思班不賽因等遣使獻文豹及佩刀珠寶辛
酉太傅朶解爲太師太保禿魯忽爲太傅也可札魯忽

赤伯答沙爲太保召翰林學士承旨張珪集賢大學士
廉恂太子賓客王毅至都悉復舊職陝西行台中丞敬
儼爲集賢大學士並商議中書省事壬戌車駕幸上都
阿散火者知樞密院事諸王不賽因遣使獻文豹獅子
夏四月辛丑盜竊太廟武宗金主及祭器大理慶甸蠻
酋阿的叛己卯道州徭叛癸巳高州徭寇電白縣千戶
張恒死之己未武備寺卿阿昔兒答刺罕爲御史大夫
五月辛丑大尉丑驢卒己未占城國來貢方物丁卯元
江路蠻酋普奴叛德慶路徭降六月辛未翰林侍講學
士阿魯威直學士燕赤進講命譯資治通鑑以進丁丑

左丞相倒刺沙等以災異乞罷黜不允罷兩都營繕工
役錄各路繫囚甲申廣西花角蠻叛乙未紹慶路四洞
蠻酋阿者等降秋七月己亥八兒忽部酋晃忽來獻方
物占城國來獻馴象甲辰播州蠻酋謝烏窮來獻方物
丙午有事於太廟戊午八百媳婦酋招三斤降乙丑周
王和世琫及諸王燕只哥等來貢方物丙寅籍僧道有
妻者爲民八月庚辰田州洞獠叛癸巳加謚武宗皇后
宏吉刺氏曰宣慈懿聖皇后英宗皇后亦乞烈氏曰莊
靜懿聖皇后並升祔太廟是月崇明州海溢汴梁路扶
溝蘭陽二縣河決鞏昌府山崩九月丙申朔日有食之

已未靜江徭叛右江蠻酋岑世忠來獻方物

致和元年春正月乙丑朔高麗國遣使賀正旦並貢方物甲戌有事於太廟丁丑頒農桑舊制十四條於天下仍詔有司察其勤惰占城國來貢方物且言爲安南所侵詔和解之辛丑靜江徭寇靈川臨桂二縣戊子詔護送爪哇國王札牙納哥還其國二月乙卯牙卽國來獻方物庚申改元致和免河南白實田糧稅一年被災州郡糧稅一年流民復業者差稅三年疑獄繫三歲不決者咸釋之三月甲戌雅沛國來獻方物甲申戶部尙書李家奴祀海神於鹽官州造浮屠二百一十六以厭海

溢戊子車駕幸上都己丑雲南蠻酋撒加布來獻方物
夏四月丙申欽州獠黃焱等叛己亥塔失帖木兒倒刺
沙請蒙古色目人效漢人丁憂者除名從之是月崇明
州大風海溢五月廣西普甯路妖僧陳慶安作亂僭號
改元己巳八百媳婦蠻來獻馴象大理怒江甸蠻酋阿
哀欽叛甲申安南國遣使來貢方物戊子嶺北行省平
章政事塔失帖木兒爲中書平章政事六月丙午祀世
祖神御殿秋七月己巳遣中書平章政事買閩等至高
麗質問高麗王王燾奪瀋王暲世子印事庚午帝崩於
上都年三十有六葬起輦谷八月甲午僉樞密院事燕

帖木兒等反於大都迎懷王圖帖木兒於江陵九月皇太子卽皇帝位於上都改元天順冬十月辛丑齊王月魯帖木兒等以兵犯上都左丞相倒刺沙奉皇帝寶出降少帝不知所終

史臣曰孔子稱叔孫昭子之不勞泰定帝討鐵失等弑君之罪雖叔孫昭子何以尙之文宗篡立欲厭天下之人心誣巖之辭無所不至惜乎後世之君子不引孔子之言以論定其事也

新元史卷之十九終